

諸道加造兵船今聞諸道飢饉其勿督促只令當領水軍造之○辛卯  
太白貫大陰○禮曹啓謹按儀禮期之喪十一月而練十三月而祥十  
五月而禫注云此謂父在爲母也朱文公曰喪禮須從儀禮爲正如父  
在爲母期非是薄於母只爲尊在其父不可復尊其母然亦須心喪三  
年願自今九父在爲母喪一依古制十一月而練十三月而祥十五日  
而禫心喪三年從之 太后之喪 上王據儀禮使 上服期喪 上  
以 父王之命勉從之禮官由是有此議○壬辰視事○日本泚州太  
守源昌清遣人獻土宜回賜絲布百九十匹○癸巳霧○以將薦肉膳  
告于 文昭廣孝殿○上王命 恭靖大王魂殿亦依原廟例進肉膳  
○訓春于知哈沙其大等三人來獻土宜○甲午親傳 宗廟原廟諸  
陵寢朔祭香祝○賜酒于功臣嫡長會○是月無冰○十二月乙未朔  
上詣 廣孝殿行朔祭始用肉饌○視事○于知哈豆稱哈等來獻土  
宜○司憲府啓有朴可中者出入左議政朴訔家府吏以爲奔競執之  
以來尋聞訔之族人即放之訔令舍人吳先敬召府吏詰問云并禁族  
人有教旨乎先敬又以無回荅差人至府吏家拿致問之陵茂臺綱又  
爲本府所劾公然出入私謁訔第知有私門而不知尊主之大體請治

其罪 上不允掌令許誠固請 上曰先敬雖有罪不可以此罪之竟  
不允○丙申 上王幸樂天亭○日本防長豐三州都護大内殿家姪  
多多良滿世遣人獻劍四把硫黃三千五百斤剪黃二斤丹木三百斤  
白礬一百斤回賜麻布四十匹緜布二百六十四匹○丁酉 上朝樂天  
亭 上王命召柳廷顯朴訔李原金承霆延嗣宗議咸吉道泂海州郡  
守禦之事仍設小酌○戊戌 上王還豐壤 上還宮○己亥視事○  
庚子前判清州牧事禹希烈卒○壬寅視事○咸安人前副司直趙成  
俊與其弟成福不和常欲害之知郡事崔道源其表兄弟也素與成福  
爭臧獲有隙成俊誣告成福有誹謗語命三省義禁府雜治果服誣  
上曰道源成俊誣告情甚姦惡其誰薦爲守令乎乃杖成俊道源一  
百流遠方○日本國九州都元帥右武衛源道鎮遣人獻土宜求大藏  
經及大鑪田平殿源省亦因道鎮使人就獻土宜○吏曹啓奉常寺直  
長錄事副錄事俱以成均校書館承文院叅外官充差仍兼本館以次  
去官從之○癸卯以元肅爲吏曹叅判轉金益精知申事韓惠同副代  
言○日本國九州摠管源義俊日向州刺使藤元久等各遣人來獻土  
宜○置黃海道海州江原道江陵三陟杆城等鎮○甲辰視事○丙午

親傳臘祭香祝○上王幸樂天亭○丁未 上詣 廣孝殿行臘祭朝  
樂天亭 上王召柳廷顯朴訔李原卞季良許稠議事設小酌賜雉各  
十首○囚承文院校理鄭萃于義禁府以爲吏曹佐郎時不差 廣孝  
殿執事也○戊申 上王還豐壤 上至自樂天亭○己酉 上詣 廣  
孝殿行望祭○視事○釋鄭萃命吏曹判書孟思誠叅議閔校就職  
思誠等以鄭萃之囚引嫌不仕故有是命○還給金聽崔興孝羅有綬  
閔寅朴幹職牒○戶曹啓諸掌錢穀之司文券每於官吏適代時吏典  
不用意藏之因此遺失誠爲未便今後依六曹三司例代其職者代其  
事錄其所掌文券幅數及錢穀出納年月日并記所掌吏典姓名交付  
新官後給解由每當年終磨勘上項文券書其目錄三件分置戶曹司  
憲府本司以憑後考從之○副司直許萬石家奴上佐與私奴龍三龍  
萬典農寺奴古未等密言曰吾主萬石與其兄盤石末石安石曾懷異  
志與妻父光祿寺大卿權永均判尚州牧事金士清共謀舉事約已定  
矣益平君石根家奴長壽聞其言於古未即縛古未告于礪山縣監趙  
玕玕驚怖率長壽擅發驛騎馳赴京師直啓 上命義禁府鞠之惟士  
清令其道觀察使訊之○庚戌視事○辛亥視事○上謂許稠曰卿不

考禮書參定祭儀以致差誤耶稠對曰臣罪大矣然鄭奉既任儀禮詳  
定所知禮書而茫然差失 上曰鄭奉則既以非矣卿亦考文獻通考  
洪武禮制山堂考索諸書參酌時宜詳定祭禮毋令貽笑後人稠出  
上謂益精曰稠尚執迷不悟召稠明言之○女真十餘人來獻土宜命  
厚饋之賜衣服冠履例也○壬子日珥○上謂代言等曰權永均等事  
必誣告也然事關 宗社不得已下獄今天氣甚寒令義禁府解其鎖  
修葺所繫之處勿致寒冷○癸丑視事○全羅道觀察使張允和啓道  
內州郡因旱失農請發倉賑之 上以問左右對曰歲前舊穀未盡猶  
可自活請待來春賑之從之是年早早晚水又霜降失時全羅道古阜  
金堤萬頃等郡縣尤甚○甲寅視事○慶尚道彥陽人李新起妻一產  
三男賜米○上王曰多畜不用之狗虛費廩粟其弊甚大况狗料與人  
同誠爲未便今後每朔減三斗擇留良者五隻餘悉分賤諸臣○乙卯  
上朝豐壤○丙辰 上還自豐壤○丁巳霧○視事○戊午停立春  
賀禮春幡子但進子 上王殿○上王將謁 健元陵 上遣右代言  
鄭招點視奠具○己未 上王謁 健元陵 上行別祭于 廣孝殿  
○辛酉 上謁 獻陵○上王命兵曹曰予爲大妃旣已終制義當用

樂也第以國家喪國母舉朝憂戚我獨聞樂心有未安不敢遽也今歲  
且改矣情雖無窮聖人之制不可過也予豈若恭愍之於魯國公主乎  
且宗廟之祭亦既用樂予生宗廟也欲於元日上壽用樂但群臣不  
可舞也趙末生對曰主上餘哀未盡獨用於上前乃可上王曰  
以用樂之意傳諭代言司禮曹及三議政○賜酒二百瓶于藏冰軍冰  
不堅合故合丁藏之 上王以冰庫去豐壤甚遠輸者苦之乃於離宮  
之東別作水庫以革其弊○壬戌視事○全羅道觀察使啓象之爲物  
無益於用今令道內四界首官輪次養飼其弊不貲道內之民獨受其  
苦請并令忠清慶尚道輪養 上王從之○癸亥 上詣豐壤官守歲  
命百官遙賀 帝正停本朝賀禮○命逐疫毋用雜戲○釋權永均

世宗皇帝大王寶鑑卷第十

命百官... ○命... ○命... ○命...

世宗皇帝大王寶鑑卷第十

命百官... ○命... ○命... ○命...

世宗皇帝大王寶鑑卷第十

命百官... ○命... ○命... ○命...

世宗皇帝大王寶鑑卷第十

命百官... ○命... ○命... ○命...

世宗皇帝大王寶鑑卷第十

命百官... ○命... ○命... ○命...

世宗皇帝大王寶鑑卷第十

世宗莊憲大王實錄卷第十一

三年

大明永樂十九年

春正月甲子朔

上在豐壤離宮群臣以朝服遙賀

帝正于昌德宮樂懸而不奏以白衣烏紗帽進手帕諸道進箋獻方物

上王命宗親諸君及二品以上外母得親賀 上上壽親勲宰執咸

以吉服侍宴凡五十八人宴會之盛近所未有是宴也始用樂 上不

戴花插於案床巾用黑器用漆酒行 上王拭涕謂左右曰昔日主

上為壽於我即入內為壽今日不見此事也 上亦流涕朴嘗以 上

王不樂欲作歡乃起舞諸人繼之 上扶 上王立 上王曰一國群

臣愛我若是何哉再言予實有福蓋以付托得人而自慶之辭也 上

王起舞久許稠啓曰恐勞 聖體 上王曰我每日乘山射雉亦無所

勞此安足為勞稠扣頭曰每日乘山臣常為慮 上王曰誠哉儒生之

言也乃罷 上扶掖入內夜已二鼓矣先是每歲除夜賜佩刀弓箭等

物于入直臣僚以為賭注至是方在三年之內以戲事除之○乙丑

上還自豐壤離宮○丙寅視事謂近臣曰比年饑饉民或絕食諸敬差

官不顧大義惟以辦事為心往年民間所貸義倉之穀徵納太急民受

其弊其論敬差官民之貧不能償者勿令強徵予在深宮民間之事不

得盡知如有利害切於民間者爾等當悉啓之又曰佛氏之道無益於禍福明矣 父王不崇信我若崇信則今 母后昇遐當此哀慕之時豈不大設佛事以修冥福乎然七七之齋及先王忌齋略設水陸不廢舊事而已須令民庶知此意○丁卯視事○上王觀放鷹于離宮近郊自御豐壤離宮以後屢出遊獵○禮曹請申明禁酒之令雖時祭上塚皆用茶不得用酒 上命祭祀用酒者勿禁○戊辰視事○上王觀放鷹于離宮近郊○李庸上言曰今獻陵山水布置回龍顧祖誠為大地然於左山之內稍有向外之支傷破之隴深為未便昔郭景純曰青龍蜿蜒范越鳳歌曰似龍蟠兮如象捲宛轉有情無遠近先看回抱要分明縮瓜蔽牙無背反又曰欹側不正在左則為不可皆當辨而治之可也至玄論曰山有不足法貴添增伏望於向外之支特命有司為山向內栽植松柏培養吉氣李陽達啓曰水口大山鎮塞小山雖不回顧不為害也又書云有贅疣則去之况此小山嫩枝餘氣向外宜於寒食掘去栽松 上從陽達言○禮曹判書荅日本九州摠管書曰披閱華緘從審體履康裕欣慰仍蒙專人來告本國使臣回還聲息深以為喜所獻禮物謹啓收訖茲將土宜黑細麻布三十四匹縣布三百七十四匹就付

回价不腆爲愧惟照領卽辰尚寒異調保不宣又答九州都元帥書曰  
累承手翰獲諳體氣叶吉欣慰殊深所獻禮物俱已啓達收納論及大  
鑄因年來貴國諸鎮求去殆盡未克塞請良用爲愧姑將土宜黑細麻  
布三十匹絲布三百三十四匹就付回价惟領納時寒希自愛只此叅議  
荅藤元九書回賜黑麻布三十匹絲布百八十四匹時日本諸島使者絡  
繹驛路疲弊其來往之路分爲二道○己巳視事○命讓寧大君祿俸  
以利川倉穀給之其紬布楮貨亦以米穀准給○禮曹正郎金復恒荅  
多多良滿世書曰人至尊書備承君家世勤通好所獻禮物謹已啓達  
上嘉之命本曹厚待來价仍賜縣布二百六十四匹黑細麻布四十匹  
給付回使惟足下照領佐郎房九達荅宗金書給縣布七十匹○上王  
觀放鷹于近郊○庚午停人日賀禮○前此有被虜漢人自倭逃來者  
上命給衣食而館之至是解送遼東○上以遺典多藏于忠州史庫  
親閱書籍簿擇其切於觀覽者遣藝文奉教鄭周生取來○辛未月犯  
畢歧星○親傳 齊陵春享香祝○壬申親傳 宗廟啓聖殿健元陵  
文昭殿香祝○兵曹奉宣旨發百官品從及京畿丁夫栽松于豐壤離  
宮西離宮 獻陵廣孝殿後岡○癸酉上詣廣孝殿行春享○上曰許晚石

之事幼時狂言不必加罪予欲放之已啓 父王然關係匪輕有司必  
不舍嘿且晚石今不辨明後難自明義禁府宜加鞫問務要得情義禁  
府啓晚石年十四時與上左語曰卜者云吾命極好何時得爲政丞上  
左聞此語飾辭誣告耳 上即命釋之盤石亦以知司諫繫獄命就職  
誅上左○洪州人李成言於懷安君子孟宗家奴曰州人李才密語其  
子乙生曰吾率禾尺才人草竊洪州界則可以得志矣如不得志與三  
島倭合謀寇本國則可以屠城略地而前日懷安之亂斯爲下矣孟宗  
聞之告牧使趙琬琬率李成騎駟赴京直啓 上命義禁府鞫之成以  
誣告杖一百流三千里○野人來獻土宜○興寧府院君安景恭卒景  
恭字遜甫慶尚道順興府人判門下府事宗源之子平易謹恪登高麗  
丙辰科累遷密直司左副代言我 太祖開國與諸將相推戴進左代  
言策爲翊戴開國功臣官制行遂拜中樞院都承旨陞司憲府大司憲  
封興寧君歷判恭安漢城府進封府院君嘗按慶尚全羅黃海道寬簡  
不苛卒年七十五輟朝三日謚良度溫良好樂良心能制義度子純○  
甲戌知申事金益精等啓曰守令允有啓達事不能自達傳報監司例  
也今趙琬所啓之事雖曰關係社稷勢非甚急且監司在隣邑琬不報

監司擅發駟騎以干邦憲宜令私馬還任以示不當來之意 上曰琬  
雖報監司不為晚也今乃亟來然察之未明耳實非私事也可給馬以  
遣之○乙亥命集賢殿直提學申檣金赭授元子小學時 元子年八  
歲勤學尊師不好嬉戲○戶曹啓田案已成之後曾受田而未滿科者  
與新從仕而未受田者以閑田給之或妻適受夫田或子孫適受祖父  
田更相折給而不離改因此田案不明願自今每三歲取都田單字令  
受田者具錄其所受田數字號納于本曹以正田案如無故而不及限  
者或書不以實而瞞官者奪所受田許他人科受 上命勿奪田以違  
令論○丙子 上王觀放鷹于松山綠楊之原遂如樂天亭 上詣樂  
天亭問起居○禮曹啓謹按周禮圭瓚璋瓚皆無臺本朝 宗廟銀瓚  
盛於盤有違古制請勿用盤從之○新置大靜旌義兼教導○禮曹啓  
進上物目內於慶尚全羅二道錄红柿而不錄乾柿錄引鮑而不錄生  
鮑於咸吉道錄古道魚而不錄腹掌醢白饊飴糖惟產於全州而亦不  
載錄右件等物宜并令供進且平安道之膏雉凍魚濟州之柑子柚子  
洞庭橘乳柑青橘藁蒿榷子早藿圓鮑引鮑條鮑推鮑烏賊魚等物亦  
將趁節供進命除濟州進上○宋希璟啓今以通信往日本時霸家臺

住倭惟卧仇羅者以指路隨行至國都臣等爲彼所拘內外不通惟卧  
仇羅探彼計謀一一來報不顧產業間關萬里乞加賞賜命給縣布六  
匹○江原道觀察使啓道內諸驛廩給田皆山石瘠薄不用之地不足  
支數月之供驛吏皆自備以給歲在丁酉人馬位田始皆收之公廩以  
補廩給而尚且不足今敬差官又以未立位田並屬軍資宜還給諸驛  
從之○高麗恭讓王女丹陽君禹成範妻王氏申訴曰歲在丙申追封  
父爲恭讓王母爲王妃因命定陵號給守護戶又令與享於高麗八位  
令禮曹詳定而至今未定緣此耕田樵芻靡不爲之以無定法未能禁  
制請復陵室旁近奴子一戶俾令守護 上從之促禮曹詳定施行○  
司憲府啓竹山人前延安都護副使朴翱陵辱縣守且於國喪率哭前  
捕魚請治其罪以其父永忠爲太祖原從功臣原之○丁丑 上至自  
樂天亭 上王遣內臣韓吉文賜祭于興寧府院君安景恭曰生秉忠  
義之心而功存 社稷沒有吊恤之禮而恩極哀榮此古今之常規邦  
家之彝典也惟卿三公華冒六藝名家世襲箕裘之資少無紈綺之習  
昔麗運土崩 太祖隆興卿乃知天人去就之機察運祚興衰之理贊  
襄一德肇造東方誓以帶礪勲在旗常矧惟耆英宿德邦國筮龜若子

若孫世濟其美常擬必壽之可期豈圖元老之不憇忽焉聞計何以爲  
心茲將菲薄俾奠殯次於戲同心戮力啓王業於無窮紀德褒功慰貞  
魂於不昧○上命服喪未終制者除特旨外母得任叙○戊寅鼠齋  
宗廟一室神主函袱○漢平君趙洵等啓功臣數小三功臣嫡長僉摠  
制以上依功臣例參朝啓從之○上王觀放鷹于近郊謂尹淮曰棄妻  
畜妾風俗衰薄非國家美事功臣雖無嫡子若賤妾所生不宜屬之忠義  
衛也○已卯月食○視事○賜几杖于昌寧府院君成石璘石璘時年  
八十四強健不衰自製箋謝曰乾坤育物不遺擗櫟散材雨露施恩覃  
及桑榆晚景洪纖各正性命老幼咸遂生成伏念臣一介腐儒四朝舊  
物何圖几杖之賜荐加斗筭之資幸依日月之末光叨參佐命顧乏涓  
埃之小補褒以輸忠雖在懸車猶霑爵祿久生同原壤之無述殊錫比  
孔光則有加枯槁生華皮膚再肉茲蓋伏遇至誠無息大度有容憲章  
動法乎古先禮貌尤隆於耆鳧脛短弱行携鳩刻之輕鮫背瘠消坐  
倚烏皮之穩慈踰怙恃保若提孩謹當仰體洪私俯忘沉痾期將望秋  
之蒲質庶効向日之葵誠朝昏一炷之祈天寧無報應狗馬寸心之戀  
主不間幽明箋上 上曰予遵古事耳反以動卿心也○上遣內臣賜

祭于安景恭曰翊運開國人臣之大勲崇德報功國家之令典縱幽明  
之已隔盍息禮之優加卿聯貂閣閱累葉文儒以剛明之資服家庭之  
訓識通今古心篤忠貞當麗季之失道知天命之有歸翊戴 聖祖彌  
成丕基蔚有殊勲載在盟府念惟舊德無愧前賢中外歷揚聲名籍甚  
有子有孫惟忠惟孝方幸獨亮於四世式著儀表於百僚胡不勸遺而  
至遽奪興言及此曷勝痛傷俾就素帷聊陳薄奠於戲心同休戚茲永  
肩於始終恩極哀榮豈有間於存沒○權知成均學諭李馨期本定山  
縣吏匿其世係冒稱士族乃登庚子科至是憲府劾曰仕進之初巧飾  
虛偽欺罔朝廷若令從仕則姦巧冒濫之徒繼蹤而起請依律科罪從  
本定役其保舉金南秀尹會宗皆論如法 上命奪馨期紅牌餘皆勿  
論○命構昭頃公禔祠堂○禮曹判書荅源義俊書曰使至得書從審  
體履清勝仍知本國使臣蒙厚慰護送穩涉海洋良用爲喜所獻禮物  
謹已啓納併送管下平宗壽滿京等使者亦令禮待茲將黑細麻布三  
十匹縣布四百七十匹就付回价惟領納正郎金復恒荅宗壽滿景書  
賜宗壽黑細麻布二十匹縣布二百八十匹滿景黑細麻布二十匹縣  
布三百八十四匹○金羅道觀察使張允和啓金堤郡碧骨堤古阜郡訥

堤潰決曾命待豐年修築臣今巡視訪問利害堤岸雖決而水猶淤塞  
堤內良田沉水者鉅萬且當農月若致大決則堤下農夫盡為漂沒請  
加開決聽民耕種命議政府諸曹議之多是允和議上從之金堤郡  
人朴礎時爲金羅道水軍都節制使上書于上王曰金堤郡碧骨堤自  
新羅已築之實東方巨澤聖上勵精圖治允民之利害必欲興除歲  
在乙未命知郡事金倣監督修治役民纔二萬僅二十有餘日而事功  
告成堤下之地皆爲沃壤公田之穫歲計千斛而軍民之食亦且足矣  
然則堤之有利於公私審矣近有執事者以堂堂之堤恐獲潰決之罪  
妄度修補之難以爲必動民四萬餘人設木柵五重然後堤乃完固乃  
命待豐年修築敎命纔下執事者以爲國論必不急於斯使其郡守問  
民以破決之可否民亦恟惑阿意竊議相告曰不從破決之問則當有  
獨役之苦雖蒙其水利者靡然曲從若令雨則開渠以泄之旱則防塞  
以貯之得其通塞之方又何慮乎汎濫激岸乾燥防農之患哉堤之完  
固水之利害固在監守者之賢不賢如何耳其在修築之初究覈堤之  
上下土壤膏瘠田數多少察其民心之好惡然後具奏取旨而成之其  
立石紀績所以著聖代務農字民之政昭示千古者也纔值一年之雨

遠欲棄之仍而害民者何毀而利民者何臣未敢知也堤之形上窄如周道下廣如丘陵水不溢於上則必無潰岸之害何汲汲乎補築哉且古阜之訥堤歲戍秋僅役萬人閱月而成依古者井田什一之法畫爲經界受私田九結者同養公田一結其地沃饒公私兩獲俱爲贍足其利之博立石紀績亦與碧骨相侔今不幸值雨潰決非堤不固乃監守者不能疏通之致也責有所歸而執事者反以堤防之處有所不宜不計省力補決之爲便輒生妄度設以輕動數萬之衆移築舊堤之下廣蕩之坪并入保安縣南郊掘山野爲渠西通黔浦之海以免潰決之患亦未敢知也若欲防塞則可用七八百之民不過二十日役臣受命南來道過二堤之岸補決訥堤禁毀碧骨誠今日之急務也不然則臣恐堤之上下良田皆棄於無用也伏望 陛下採而納之幸甚命政府諸曹議之吏曹判書許遲請從礎議領議政柳廷顯等皆曰礎與允和所見不同宜遣朝官與二人同審以聞宣旨昔富平堤堰遣戶曹憲府官同審後修築尚且決毀今遣朝臣審視徃復之間必屆農時宜待豐年更築之○戶曹啓諸司錢穀日就耗減名存實無若不更張弊將難救諸司月令監察本令六朔相適而今也不然每日分臺不計月令任

意換差而爲監察者亦不用心照管自今月令監察毋得輒換使月令  
監察不待祿官齊坐直坐其司所管諸事靡不檢察若無時供上及使  
臣支應等一應及期事則以庫外所儲用之須於翼日請臺上重記月  
令監察或有故則須於三月內差他監察上重記若有過限不得上重  
記者每月季具報本曹覈實移文憲府且新舊官交代新掌錢穀置簿  
交割之法載在元典第以一司一負所掌或至累萬未易一一考檢其  
軍資監豐諸倉等各司米粃以所儲年月最久間閣爲首以千字爲標  
號令祿官分掌當交代時已反庫米穀計數傳掌如有虧欠移文攸司  
隨即追徵解由內明白具錄以憑後考金銀錢帛等諸般之物亦令分  
類入庫其分掌及交付追徵並依上項例從之○庚辰視事○三韓  
國大夫人宋氏遣奴于濟州收無疾無咎骸骨以歸上命濟州安撫  
使給船隻糧米○壬午視事○賜几杖于玉川府院君劉敞藝文大提  
學柳觀○上王遣內臣鄭元龍賜祭于晉山府院君河崙妻辰韓國大  
夫人李氏教略曰晉山既頹痛惜之情未已夫人又逝吊恤之典斯加尚  
期貞魂應此寵章○宣旨司僕官負及養馬等憑調生馬擅騎內廐馬  
甚爲未便今後提調外非行幸與特旨毋得騎之○戶曹啓國用黃金

幾盡乞於咸吉道和州端川安邊每歲春秋發丁夫各役四十日採取  
其三郡貢物量移他道從之安邊每春秋各貢黃金三十三兩和州四  
十兩端川二十七兩○禮曹啓自今先王忌齋內資寺設於藏義寺  
先后忌齋內瞻寺設於津寬寺永爲定式從之○京畿觀察使啓田  
地決絕條款一人民或當農時以遭喪疫疾等頃大故不得耕作奸猾  
之徒因其陳荒而起耕反稱爲白根終不還給者有之今後勒還本主  
以爲定法其二年以上耕作者勿論是非並從白根一父母早沒其子  
息年壯者與幼弱者同居耕其田而共食及其成婚雖各立門戶以己  
之耕作已久妄稱白根不肯分給者有之今後待其年壯並令均分  
上命因有故代耕他人田者限五年並還其主○癸未視事○禮曹啓在  
前文昭殿進上諸道觀察使但以稀貴新物供進近來雖非稀貴之  
物亦并供進今後新物外勿令進上從之○甲申視事○上遣宦官賜祭  
于河崙妻李氏教略曰念宗工盡贊襄之道嘉內助執柔靜之儀忽聞  
訃音良切傷悼聊將薄奠俾展素帷○乙酉視事○忠清道觀察使啓  
今新置都節制使營於海美內廂古城在四通之地無有守護者請移  
德山縣於城內上王從之○禮曹據禮賓寺呈啓羊猪鷄鴨唐鴈前

此分養于水碾

院在洪濟

仍火島

在西

等處差遣權知直長俾令監養而

不用心喂養緣此羊猪日瘦請於水草好處依典廩署例造官廨分遣

本寺官吏監養從之○丙戌視事○柳觀上箋謝賜几杖箋曰幸遇明

時得際風雲之會親逢聖主偏承雨露之恩先生閩里喜及族宗伏念

臣器非瑚璉材極斗筭叨竊史編之緒餘未諳理學之蘊奧經筵三載

之進講愧乏精微春秋兩年之撰修未辨筆削况藝文爲文官之領袖

集賢亦賢士之選掄罔知施爲深切感悵豈意稀世之寵荐加腐儒之

躬烏皮穩身端合鮐背之瘠瘦鳩刻扶老實賴鳧脰之步趨錫與之榮

前古所罕茲蓋伏遇心敦化育德洽生成記臣擣櫟散材憐臣柔榆晚

景遂令衰朽獲荷殊榮坐倚興居保餘齡於旣耗扶持朝夕祝聖壽無

彊○禮曹啓前者命構之和陵碑閣然樹碑於傾側之地立閣爲難請

移樹平地從之○上王命禮曹諭對馬島商倭表温而老曰通信使宋

希環之還也貞盛弟熊壽言今後不與互市以此觀之其欲絕文明矣

故一應商倭並令勿許接待廩後商船受熊壽文契而來者至五隻國

家以希環所啓或是傳聞之誤故許令買賣而歸今爾等之來也又無

熊壽辨明之言然爾等不與熊壽同居容或不知今後商船之來也明

知其事以來○丁亥 上王幸樂天亭 上先詣樂天亭迎候置酒柳廷  
顯李原趙涓趙末生許稠洪敷河演金益精侍○上遣宦官賜祭于上  
洛伯金士衡妻馬韓國大夫人朴氏教略曰先正推誠功在社稷國家  
惇禮恩及閨門惟朴氏稟性溫柔操行淑慎相厥宗工爵爲命婦忽聞  
訃音倍切傷悼茲將菲薄俾奠總帷優加恒典用慰貞魂大臣妻死未  
有賜祭者以河崙金士衡有功於國特賜之○戊子 上還自樂天亭  
○上王遣兵曹參議尹淮諭議政府六曹曰予從近講武欲與主上偕  
行主上時未終制人必有疑然豈使佩弓矢逐禽獸乎但欲常常見之  
不離左右耳予既老矣非主上誰與同懼卿等幸無恠也○兵曹啓曰  
奉 王旨使臣外不得擅發駟騎已有著令今礪山縣監趙玗洪州牧  
使趙琬擅騎赴京且驛丞莫敢誰何自今事干謀叛情迹近似者以雙  
馬直達情不近似者須報觀察使違者科罪從之○囚鄭周生于義禁  
府初 上遣周生于忠州也命之曰毋夜行以慎行邁戒其犯夜倍道  
也周生遂稽留旬日乃命鞠之○己丑 上王還豐壤離宮○上視事  
○庚寅視事○以漆原君尹子當爲賀聖節使○命囚忠州判官朴就  
新于義禁府以請留鄭周生也○癸巳親傳 宗廟文昭殿山陵朔祭

香祝○前此以鄭道傳所撰高麗史間有與史臣本草不同處且稱制  
勅稱太子之類語涉僭踰命柳觀卞季良離校至是書成乃進○二月  
甲午朔親祭廣孝殿○視事○朝豐壤宮○遣判府事朴子青禮曹參  
議許咳于 獻陵監督開渠種柳○囚行大護軍任君禮于義禁府○  
乙未 上還自豐壤○讓寧大君提令冶工造窓戶粧鐵利川縣守慎  
以衷聞而疑之呼冶工問曰汝造兵器幾何提遂上書訴寃 上命義  
禁府囚以衷鞫之○行司直洪仁富妻親親于咸吉道 上命賜米二  
十石豆二十石仁富妻 上之乳媪也○慶尚道右道水軍都督制使  
啓船上火炮年久無氣請改給新仍遣放火慎熟人七八以年久不用  
火炮教習士卒又抄道內曾經萬戶千戶慣於船上者及閑良人並率  
赴巨濟島防禦 上王從之○丙申日珥○咸吉道觀察使啓甲山郡  
境連彼土防戍甚苦故其子弟未有從仕于京者僅有解文筭爲鎮撫  
者亦未有錄用之典請依北青慶源例每年一人除咸興土官 上王  
從之○丁酉遣臣官賜羊酒于讓寧君提○戊戌視事○罷鄭周生職  
釋朴就新還任○教曰比年以來水旱相仍連歲饑饉前年尤甚民生  
可哀各道監司守令仰體予意持賑濟之物殘疾人爲先賑給將遣朝

官巡問閭閻如有一民飢死者從重科斷又教曰各官書冊板本主者不爲用心照管致使散棄宜令所在官吏整頓收貯○吏曹判書孟思誠以父病辭不允命給傳賜藥遣之思誠父希道時住忠清道溫水縣○戶曹啓寺社奴婢皆屬典農寺有田者收米貢無田者收布貢而各司奴子收貢未有定式請依典農寺奴子例所耕田三結以上收米貢從之○己亥書雲副正趙義均告期服吏曹請令出仕上曰我朝明功之服給暇其迫有司又從而請令出仕是豈厚倫之道乎今後朝廷使臣出來時外母令出仕○禮曹啓侍衛軍士百日行喪後請祥禫之暇欲歸其鄉者頗多謹稽朱文公家禮祥禫之祭皆行於祠堂經濟六典起復人貢大小祥祭給暇三日禫祭五日自今軍士祥禫依六典給暇令祭於祠堂從之○庚子視事上王幸樂天亭上遣宦官李村問起居○全羅道觀察使以年凶請除奴婢貢從之○咸吉道觀察使啓自端川碁原驛至施利驛里數甚遠且踰磨雲嶺嶺路高險人馬俱困不勝其苦嶺下有古館基請置合排以附近人民屬之且洪原平浦驛吏不過一二戶請選民戶置合排以助之上王從之○辛丑節日使尹子當如京師賜衣服笠靴上以黑衣烏屨帶拜表百官以

朝服行禮樂陳而不作○命慶尚道觀察使祭晉山府院君河崙墓○  
壬寅 上朝樂天亭 上王還豐壤路上召兵曹參議尹淮曰近日我  
將行幸我若累日不還主上必憂之省之曠我亦豈不欲與主上偕行  
况大妃已即世矣主上爲誰獨留都耶其以予意宣告三議政因而墮  
淚○兵曹啓乳牛所專爲供上而設置諸負二百每年遷轉官至五品  
而爲別坐者不考能否名存實無請罷乳牛所 上王殿供上乳牛屬  
於仁壽府 主上殿供上乳牛屬於禮賓寺其諸負令所在州郡充卑  
從之○癸卯視事○義禁府啓慎以衷之罪當杖一百徒三年 上曰  
大君雖不謹慎爲縣守者固當多方以處之使無嫌隙也以衷妄疑大  
君以間我兄弟其依律施行○兀良哈好所老來獻土宜○通事金義還  
自京師言 帝以江左 太祖皇帝肇起之地北京地勢雄壯山川鞏  
固并建兩都置立郊社宗廟創建宮室以永樂十九年正月朔御奉天  
殿受群臣朝詔告天下禮部錄文與之又山東青州府渚城縣青水潭  
龍馬出焉孝陵松栢降甘露其凝如脂群臣表賀○上王謂知申事金益  
精曰正朝使副使以大妃之薨再三告于禮部其爲不可禮部若與節  
日使言此事則當荅曰此非本國之意也宜遣承文院官諭此意于節

日使以全義所啓有是命也○上稟宣旨復置飯監二人于 文昭殿  
使先期齋宿輪番掌膳○全羅道觀察使請復置青松驛 從之○甲

辰 上王命兵曹曰今 皇帝定都北京禮當進賀其令司僕寺及兵

曹各擇進獻馬十匹預養金銀之不產我國上國所知也自今於進獻

方物勿輕用之若於東宮雖無方物亦可也不得已則用馬不過四匹

其他方物隨宜以進○乙巳視事○玉川府院君劉敞上箋謝賜几杖

○禮曹啓國葬及大臣禮葬哭婢在前以市塵女爲之 恭靖大王及

元敬王后國葬時依古制令宮人哭從今後大臣禮葬哭婢用本家

婢從之○禮曹據忠清道水軍都安撫處置使報啓前者以兵馬都節

制使兼之今新置都安撫使請依諸道安撫使例正至訖日獻方物

從之○全羅道觀察使以年歉請除貢鐵 從之○丙午 上王將講

武于鐵原欲與 上偕行 上以喪制未盡固辭 上王曰雖從講武

非是從獸也但侍膳問寢而已若不從之定省曠矣雖未終制爲我從

行 上不得已從行遣奉寧府院君福根告行于廣孝殿遂行至綠揚

原 上王亦自豐壤至會于瓮巖之南 上王命侍衛軍士及行幸諸

事除不得已外一切蠲減晚次揚州東存野京畿觀察使成拵經歷李

叔時揚州府使洪理等以朝服來見諸道觀察使遣人獻方物○丁未  
以大兩留○囚都摠制李湛僉摠制沈寶上護軍權踐于義禁府以辭  
連任君禮也○戊申以霖雨川漲道途泥濘 兩上偕還豐壤宮揚州  
東有川汎溢幾不能涉留都群臣遣戶曹叅判崔士康來問起居○己  
酉 上王未寧 上留侍親奉藥餌○放李湛沈寶權踐等○議政府  
遣舍人金願問起居○庚戌 上在豐壤○辛亥 上在農壤○左議  
政朴嘗叅贊卞李良來問起居○輟任君禮於市君禮之父彥忠漢人  
也以譯語得叅開國功臣故君禮屬於忠義衛爲人貪鄙以譯語屢使  
上國以致巨富一時之有氣勢者必阿附時稱五方猪尾猪善搖尾故  
人之喜趨附無處不比者俗謂之五方猪尾爲忠扈衛提舉私役工匠  
於其家且有貪汚之事提調都摠制李澄疾其所爲欲薄司中物以記  
出納君禮以無前例止之因有隙相詰辱之澄聞于 上王上王削君  
禮提舉職除行大護軍君禮怨憤揚言曰 上王信讒令我受屈我欲  
與澄辨之 上王若止之我不敢也因上書于 上王辭甚倨慢有以  
李澄之愬等語 上王怒曰愬者讒也 堅子謂我聽讒命下義禁府鞠  
之以君禮不解書必有教之者詰之君禮指鄭安止發吏捕之安止亡

君禮聞安止亡言上書立意措辭皆安止所爲義禁府囚安止兄安道及妻毋妻子安止自就獄對辨曰君禮出示藁我只據藁寫之耳兩人互辨互詬君禮不肯服安止在獄中言我書君禮上書時只寫上護軍而不書行職君禮更出他紙令改書揚言曰我功臣之子而通於兩國其功大矣反惜上護軍而除行職如此之主可謂知大體乎上王非時出遊與辛禍之遊樂壺串何異我問曰上王有疾傳位兵部禮部知之耶君禮曰黃儼既知之矣兵禮部豈不知乎托疾禪位帝若知之忠惠王之覆轍在焉君禮子孟孫在旁聞之目禁之安止出君禮悟其言之不道手執安止衣逼令誓不漏言上令三省及戶曹判書李之剛左代言鄭招同義禁府鞠之安止初則垂首不言據義詰問亦不荅至半月餘吐辭辨逸君禮初不服掠之遽曰吾不耐杖一如安止所言安止指君禮子及扈衛司給事一人爲證君禮子亦曰吾不耐杖一如安止所言唯給事掠多固不服曰吾耳未嘗聞此言至是獄具論以大逆會百官於市輶之徇于四方籍家產沒妻子爲奴婢時君禮所交親者甚衆皆恐被連引○壬子 上在豐壤○癸丑 上在豐壤正朝使曹備衡曹致等回自京師欽賜大統曆一百本○上王御內殿召兵曹

叅議尹淮知申事金益精論曰予體氣平和主上一日萬幾當還京聽政○甲寅 上在豐壤○乙卯 上還宮○斬鄭安止籍家產沒妻子爲奴婢餘緣坐者皆赦之安止之與君禮對置也誣構君禮不說之言曰 上王爲後宮置東西離宮而屢遊幸且其族親皆除顯職而輕功臣之子反除行職以臆度誣毀 君上罪當死 上王以安止自首欲原之兵曹代言司請曰安止聞君禮大逆之言懷之不發累月乃因爭詰始言安可比之自首 上王曰付之公議可也 上命鄭招議於政府六曹皆曰可殺從之安止出身科第早有名譽嘗以書狀從宰相李之崇尹穆赴朝穆有不道語及事覺安止隱之免死廢棄至是伏誅○丙辰視事曹致啓曰臣至京師告于禮部曰王大妃薨逝我 殿下從以日易月之制已釋衰經越三月而棄請具辭奏達賜諡再三告禮部而未蒙俞諾致出代言等請曰致之言必取侮於中朝請令有司治其罪上不允○上王謂進賀使書狀庚順道通事崔雲等曰前者正朝使赴京時命曰禮部若問大妃之薨則對如不問則勿說禮部不問而正朝使等再三告白今禮部若問其事則當答曰計告無例故本國不達於朝廷正朝使妄以己意告白已令有司治其罪○上命禮曹曰祭祀以

清潔爲本今一造綵花而每祭用之至爲不潔今後九祭皆用紙花隨  
即改之禮曹請用羅花從之○日本國源義俊平宗秀平滿景等皆遣  
人獻土宜○慶尚道左道水軍都安撫處置使啓對馬賊倭乍臣乍叛  
其心難測當嚴警備臣所管十二浦留泊兵船或三四隻或五六隻甚  
爲寡弱請分水陸遠近要害聚諸浦兵船泊立應變 上王從之○黃  
海道觀察使啓今新置海州鎮其鎮軍三百人分定于州郡然本無閑  
役人難以充定無受田牌但春秋點閱而已無他軍役請簽爲鎮軍  
上王從之仍命他道無受田牌恒居外方避役者並依此例充軍○丁  
巳 上詣 廣孝殿行寒食祭○視事○禮曹啓永樂九年本曹稟王  
旨祭享奠具前期二日官吏躬親賫進今諸司或使奴子賫進有違於  
法申明考察從之○戊午進賀使清城府院君鄭濯副使摠制李中至  
如京師上率百官拜表如儀賜衣服笠靴遣之表曰一人御極聿建新  
都二儀生祥載彰聖德照臨所暨蹈舞攸同竊觀歷代之持盈率置兩  
京而爲治蓋因草創之未暇乃於繼述而有成欽惟 皇帝陛下勇智  
邁湯聰明躋舜厚民生而奉天道受此丕基紹先志而貽孫謀作新大  
邑豈惟山川之雄勝抑亦道里之適均故令衆庶以舉欣而得貞符之

屢見清水龍文之遍體既產奇祥孝陵松樹之凝脂復昭上瑞是致多方之稱頌實基萬世之大平慶延宗祊事光簡策伏念臣猥將庸質幸際昌辰迹滯東藩班雖阻於漢殿心馳北闕祝切效於堯封方物表曰聖神繼述大邑告成天地感孚嘉祥荐至謹備黃細苧布二十四匹白細苧布五十匹黑細麻布五十匹人參一百觔雜色馬二十四匹右件物等產從荒裔製匪良工敢充享上之儀庶諒由中之信賀 皇太子箋曰尊居儲位德著元良密贊皇猷運昇亨泰慶縣宗社喜溢臣工恭惟偉量淵冲英姿玉裕丕從民志建萬世之神京上恊天心膺兩儀之嘉貺用致華夷之來賀良由翼亮之膚功伏念臣猥以庸資端逢昭代阻叅趨踰之列惟知頌禱之勤獻白細苧布二十匹黑細麻布三十匹人參五十觔雜色馬四匹 上謂書狀官庾順道曰爾到京師問於禮部曰表箋末書某日乎禮部曰然則復問曰始面既書欽遇某月某日 聖節千秋末又書某日則無乃疊乎則禮部必分旂言之爾當詳問之 上王自豐壤將蒐于江原道珍富等處 上告行于廣孝殿從行右議政李原平陽府院君金承運等扈駕 兩上會于楊州草豆等京畿觀寮使成揜經歷李叔時廣州牧使李桂判官金宗瑞揚州牧使洪理等

以朝服來謁 兩上置酒帳殿孝寧大君補敬寧君排恭寧君裊清平  
府院君李伯剛平壤君趙大臨贊成事趙洵參贊崔閔德都摠制權希  
達李澄李湛同知敦寧文貴李皎及李明德金益精成拚侍薦所獲禽  
于 宗廟廣孝殿 恭靖大王魂殿渡龍津夕駕次龍津東岸○己未  
日珥○上王畋于龍門山親射鹿 上未終制不御弓矢與孝寧大君  
補駐馬一隅觀 上王從獸前此奉常寺供祭肉驢用州郡所納獐肉  
或有臭惡者 上王聞之曰自今宜用菟狩所獲至是以所獲鹿十二  
頭送奉常寺作醢○三品以上問安於恭妃殿每行幸時三品以上官  
衙日問安例也兵曹以左軍節制使金萬壽都鎮撫河敬復失律請治  
其罪 不允○夕次楊根南郊○庚申晝停于驪興八大藪置酒孝寧  
大君補右議政李原等侍駕至原州金堂川江原道都觀察使睦進恭  
經歷柳士根原州牧使車指南判官金士振以時服來謁兵曹啓曰大  
駕巡臨境上不以公服來謁殊失人臣敬上之意請論其罪以戒後來  
上王不允進恭獻馬及弓矢土物于 上王○辛酉駕次蛇川設小  
酌夕次原州北郊道路不治供億不備○壬戌駕踰檜峴夕次安興驛  
下全羅道觀察使遣人獻馬及弓矢于 上王以膳羞獻于 上○三

月癸亥朔雨雪○駕踰禿嶺路甚險阻又值雨雪泥濘輜重顛仆十八  
九人馬疲困扈從者皆苦之 上王在嶺上見衛士輜重顛仆者駐馬  
命內豎載之夕次江陵方林驛之原○甲子雨雪○散丁夫二千驅禽  
于訥豆山夕駕次大和驛之野留都群臣遣叅贊卞季良問起居獻酒  
果 上曰前命五日一次問安何至七日乃來季良對曰左議政朴訥  
以謂未晚乃於前月二十九日封酒授臣緣此遲來 上王命內臣餽  
酒賜鹿二頭曰後來問安者雖逢路上汝率還京○乙丑流星出軒轅  
入東方天際○驅仇段山 上王多射鹿有二鹿奔觸御馬馬躓而墜  
夕還大和驛之野頒料于侍從大小臣僚及軍士○是日兵曹判書趙  
末生之子璿尚 上王女貞靜翁主主慎寧宮主辛氏出也辛氏厚德王太  
后之婢也○丙寅駕踰毛老峴至珍富驛之米粝村咸吉道監司遣人  
獻方物及鷹子 上王○丁卯駕留珍富置酒帳殿孝寧大君補右議  
政李原等及觀察使睦進恭侍驅五錢山兩酒 上王御兩具又驅神  
堂山侍從武臣於園內走馬射獸 上王怒 上命孝寧大君補逐射  
獸者摠制權希達拾其矢以進乃僉摠制沈寶金月下李原吉上護軍  
楊春茂等七人矢也 上命脫笠徒步宦者嚴永守俞實亦馳馬射獸

上王命脫笠縛手 上恐 上王之怒甚親率近侍等圍獸進於

上王前又命兵曹杖寶等 上王宥之 上王縛致永守等於幄前欲

杖之俄而釋之以所獲禽遣人獻于 宗廟及原廟○戊辰駕留珍富

驅松洞山 上王怒未解不御弓矢但觀縱狗搏獸○己巳駕還踰毛

老峴次大和古縣分賜所獲禽于政府六曹仍賜酒○上王欲造輕快

防牌令圍獸議於兵曹代言司皆曰可 上王進防牌于幄前觀之○

庚午駕踰秃峴次橫城縣置酒帳殿慰色從李原金承霆等侍從者四

十餘人下逮軍士皆賜酒肉○原州覺林寺住持釋休來謁賜米二百

石覺林 上王潛邸時游學之地休嘗有洗沐之勞○辛未駕次橫城

縣南郊○芳幹在洪州遘疾而死○兵曹判書趙末生以尚衣院提調

來獻衣樹仍問起居○進賀使通事仇敬夫自平壤來啟曰進獻人參

百劬不敷 上令禮曹擇濟用監人參百劬以充之進獻人參前此令

平安道備辦故到平壤乃知其不敷也後平安道觀察使啟進獻之物

令外方封裹甚為未便今後以濟用監人參進獻政府六曹司憲府眼

同封裹 從之仍命本道貢參依例上納○江原道觀察使獻酒分賜

軍士○頒料于扈從臣僚及軍士○壬申駕次砥平上鉢山黃海道觀

察使遣人獻方物平安道觀察使遣人獻鷹○癸酉駕渡龍津次于西岸○甲戌晝停禿音浦置酒帳殿孝寧大君補右議政李原等侍上王還御豐壤宮 上還京議政府率百官詣闕問起居○上王始知芳幹之死遣中使鄭元龍如洪州吊祭○乙亥視事○丙子親傳 宗廟等望祭香祝○上王命建離宮于蓮花坊洞口○兵曹啓開城府巡緝軍本分爲十二牌流亡者甚多難以充額請減爲十一牌 上王從之○兵曹啓捉虎甲士當下番皆定爲二十獨前銜捉虎未有定額乞以二十人爲定 上王從之○忠清道觀察使啓公州養象奴爲象所蹴而死其爲物無益於國所飼芻豆十倍於他獸一日米二斗豆一斗一年之費米四十八石豆二十四石怒則害人非徒無益反爲有害請放海島牧場宣旨擇水草好處放之勿令病死○慶尚道觀察使啓前者兵曹奉宣旨分置倭人等若有雜亂出入不從國令者所在守令不待啓聞大懲鑑後若交易倭奴婢逃亡者未有定法何以區處宣旨如有逃亡者嚴鞫以啓○慶尚道左道水軍都安撫處置使啓東征所獲倭船三十四隻留泊黃山江年久朽敗請破取鐵釘用於新造兵船 從之○丁丑 上祭廣孝殿○視事執義沈道源啓亂臣任君禮鄭安止

緣坐之人宜並置於法 上曰有司執法之意則然矣然予已請於  
上王 上王商量區處爾等不可固請且前此雖有亂臣緣坐者不論  
今何必罪此等人道源曰君禮之子孟孫非他緣坐之比當其父亂言  
之時牽衣止之是乃與聞固不可宥也 上曰爾言非也君臣之義雖  
重父子之恩亦大安可以君臣之義廢父子之恩乎孟孫牽父之衣禁  
其亂言則是乃君禮之孝子也豈可以與聞加罪乎道源出 上曰道  
源執法之吏徒知孟孫之與聞爲有罪而忘孟孫愛父之孝心可謂知  
法乎○行司直李陽達上書曰地理習業之徒出身之後反屬天文者  
比比有之因此全業者日少實爲未便臣竊意不惟地理出身者反屬  
天文如醫藥卜筮諸學之徒亦皆類此願自今四孟月取才時先試出  
身本業十分精通然後乃試他藝 從之○命告金銀產處者其言若  
實則令吏曹除職以賞之○戊寅視事○時三功臣將獻壽 上王悼芳  
幹之歿猶不御肉膳 上命知申事金益精左代言鄭招議於政府六  
曹皆曰 上王爲芳幹素膳友愛之情至矣然功臣之欲獻壽一國臣  
僚之望也况芳幹於屬籍已絕乎○司憲府啓各殿供上大小祭享朝  
廷使臣隣國客人饋餉外公私用酒一皆禁斷 上命只禁迎饌會飲

○己卯 上遣領議政柳廷顯知申事金益精進肉膳于 上王○庚  
辰視事○上王幸樂天亭○吏曹啓業醫者只讀方書以考藝進級爲  
務不用心於理病自今并考察病多小叙用 從之○禮曹啓獻陵若  
值雨潦則難於往來朝夕奠獻之具預備藏於齋舍 從之○辛巳視  
事○朝樂天亭○壬午三功臣及功臣嫡長獻壽于 上王設帳殿於  
東郊都飛洲之原 上王與 上臨幸 上王御胡床南向 上御依  
足平床西向功臣奉寧府院君福根昌寧府院君成石璘錦川府院君  
朴訔鐵城府院君李原玉川府院君劉敞平壤府院君金承霆長川君  
李從茂平城君趙猶漢平君趙洵坡平君尹坤谷山君延嗣宗礪山君  
宋居信及嫡長益平君石根等二十六人宗室駙馬兵曹堂上代言等  
侍宴以喪制未闕不進花于 上功臣等迭起爲壽奏樂極歡以次起  
舞 上跪上壽 上王左執石璘手右執觴以飲石璘石璘年德俱邁  
寵遇殊異人皆嘆羨宴罷 上王還豐壤 上還宮○癸未判利川縣  
事朴翹啓曰自今讓寧大君雖小事必以書諭縣守然後稟旨施行 從  
之○上遣人問安于成石璘第○甲申全羅道觀察使據濟州安撫使  
呈啓濟州人民各於田頭築墻以防牛馬踏損若有賊變不便於用騎

其防禦要害處請令破去以便馳騁 上王從之○乙酉視事○成石  
璘詣闕謝問安○召平城君趙獬賜几杖○禮曹啓謹按杜氏通典允  
大臣之卒策贈致祭皆遣朝臣備物而行今朝廷於本朝 太祖康獻  
大王恭靖大王之喪皆遣朝臣行之此古今之常禮其在高麗策贈令  
吏胥賚去致祭則令宦官行之殊失重大臣之禮本朝因循未革今後  
大臣之卒依古制及朝廷之制策贈則吏曹考勲司一員致祭則禮曹  
典享司一員賚至喪家以為恒式從之○承文院提調啓自高麗臣事  
大明以來一應文書只藏元本如有水火之災無復可考乞令謄寫藏  
諸史院於是藏于中外史庫○忠清道觀察使以道內穀種不敷請以  
陰竹國農所穀五千石給之命給二千石○丙戌視事 上謂知申事  
金益精曰不用楮貨用雜物貿易者捕告則賞之已有定法奉行與否  
問于刑曹以啓○賜鑄字所酒百二十瓶前此印冊列字於銅板鎔寫  
黃蠟堅凝然後印之故費蠟甚多而一日所印不過數紙至是 上親  
自指畫命工曹叅判李蕝前小尹南汲改鑄銅板與字樣相准不暇鎔  
蠟而字不移却甚楷正一日可印數十百紙 上念其功役之勞屢賜  
酒肉命印資治通鑑綱目令集賢殿正其謬誤自庚子冬至壬寅冬乃

訖○禮曹啓前者以本曹郎官一員兼帶條例司檢詳官以專其任近來廢而不行請復兼帶命吏曹依式兼差○戊子視事○禮曹請罷奉命別監從之高麗於大小祭享遣內侍別監使之監祭謂之奉命至于末流無所事而但立於監察之右欲罷者衆適內侍請定奉命時服色判書許稠請罷之○禮曹啓五部學堂赴學童蒙教官罷散後恣爲戲謔不專學業有違訓蒙之義自今教官一員給公廩令不離考察從之○左議政朴嘗請功臣嫡長秩卑者升秩命金益精磨鍊以啓○命購書籍于中外納書者從其願或給布帛或除官爵以賞之○己丑宣旨兵曹奉旨移文關係大體則稱宣旨若常行瑣事則只稱兵曹某官某受旨○庚寅 上詣豐壤○初大護軍宋頎別侍衛俞汝諧等二十五人飲酒於議政府西廡事覺移牒刑曹訊之刑曹啓政府百官之長非下官遊戲之處而汝諧等敢聚飲酒當以大明律不應爲答四十論犯朝令而會飲當以違令論兵曹參判李明德據吹角令啓曰無兵曹明文而私聚軍士以謀逆論已曾有旨宜以此論 上亦未然之明德還啓于 上王命下義禁府鞫之又以刑曹參判安壽山參議宋興正郎尹江金畏佐郎閔恭鄭夏崔閔溫等輕論其罪并下義禁府鞫之至是

義禁府具獄以啓汝諧等律該謀叛處斬 上王命贖杖百充邊鎮軍  
頒以功臣居信子但罷其職又壽山以下皆罷其職○宣旨今行幸時  
當道監司與首領官毋得來謁但其守令各於境內供應○典醫判事  
元鶴死賜米豆十石紙七十卷○上王命囚兵曹正郎鄭麟趾佐郎具  
綱鎮撫李寧于獄前此命兵曹曰近欲吹角令軍士預習行伍坐作麟  
趾等稽留不即奉行故囚之○辛卯 上王與 上幸抱川永平等處  
孝寧大君補敬寧君裨領議政柳廷顯左議政朴訔右議政李原等二  
十六人扈駕以甲士五百人隊副隊長別軍步兵二千人驅禽 上王  
射獐于王方山下又射鹿于深谷南山下夕次于永平縣江時原○壬  
辰命驅寶藏山 上王親射猪四次于抱川縣前郊○夏四月癸巳  
朔 上王與 上還豐壤宮○對馬島宗貞盛及都萬戶左衛門大郎  
等遣使來朝○甲午設酌于水閣柳廷顯朴訔李原及從駕二品以上兵  
曹堂上代言等待宴○先是行幸支應器皿令郡縣預備守令又使民  
自備輸納至是 上王以爲擾民命曰必不得已令工曹預造司饗司  
僕各受而藏之凡行幸以驛馬輸而用之○乙未還宮議政府率百官  
詣闕問起居○吉昌君權跬率跬近之子也辛十二尚 上王女慶安

公主拜崇政吉川君 上王七年兼虎賁司上護軍明年兼右軍都總  
制掌宿衛兵九年近牟有旨起服上書乞終制且請釋兵 不允十三  
年皇帝自南京移御燕都奉表欽問起居十六年改封吉昌君進階  
崇祿 上即位寵待特異至是病卒年二十九計聞輟朝三日不御肉  
膳者七日跽稟性溫厚持已謙恭自奉甚約事母愛敬門客有盜米者  
家僮執以告跽曰貧士也仍與之朝之士大夫聞其卒莫不惜之子聃  
聰謚齊簡執心克壯齊一德不懈簡允駙馬卒有特旨然後賜謚禮曹  
啓駙馬非他大臣之比今於吉昌君跽之喪依式禮葬外殯歛之具皆  
令官備單袂襦衣各三稱襦衿一單衿二絞用白苧布三匹銘旌紅絹  
十尺魂帛一匹葬用中等 從之以跽家貧無所儲也○丙申賻權跽  
紙二百卷米豆七十石○丁酉 上王遣宦官賜祭于吉昌君權跽曰  
生焉謂我舅而承順以誠沒則視猶子而吊恤以禮比古今之恒規  
天理人情之至也惟卿九封君孫六藝儒胄神資閑雅識量清夷遂冲  
而有守安靜而無華予深得其爲人爰陞二室作我駙馬庶幾琴瑟相  
調諒集閨門之樂雲仍式衍益爲邦家之光永終偕老保有令名不幸  
伉侶夙喪兒孫無依鰥曠靡家良用惻然所幸青春非晚方將倚爲心

替俾享富貴於永年忽聞計音何以爲心茲將菲薄俸錢總惟於戲旣  
爲兒例常加眷愛之隆奄爾仙游宜罄哀榮之數○刑曹判書許遲啓  
俞汝諧等取辭之時臣亦與議翼日遘疾不署文案臣實預聞同僚皆  
罷而臣獨就職實愧於心 上曰九處決皆從文案卿不署文案亦不  
署於狀啓毋引嫌就職○兵曹奉宣旨以淮陽通口金城金化爲講武  
場禁私獵平康水軍三十七戶減軍役使守講武場令他郡充其軍額  
○兵曹啓僉摠制以下除行職者兼考本職差下日月錄於坐目 從  
之○宣旨今分賜倭奴婢務令完恤以安其心其中頑惡者或雜亂  
橫行或與其類私通者其主隨即告官治罪○戊戌視事○上以民飢命  
戶曹出豐儲倉軍資監陳米小麥令窮民買之是時楮貨一張直米二  
升 上令給米一斗五升小麥則三斗民大悅時京畿州郡倉庫因賑  
貸罄謂故貸以軍資米京畿之民載負者絡繹不絕○對馬島宗貞盛  
遣仇里安致書于禮曹判書曰孤之不德無以控馭遂使封內之民侵  
犯大國之邊鄙是大之所不赦雖就誅戮實是孤之願也秋毫豈介于  
懷其弊邑之人或嚙使命或事販鬻而當時在大國邊境者凡三百餘  
人盡遭係累而收虜焉父母妻孥不勝恩愛戀慕之情日夜泣血毀其

性者十有八九一民不得其所仁者憂之况三百餘口乎大國幸今上有明主下有良臣豈不爲此惻然哉孤也以古視之以堯爲父而有丹朱之不肖舜亦大聖而有瞽叟之頑商均之愚然則性之善惡雖父子之間不相類故治人者於其身不於其親况於他人乎今彼誅戮之民與係累之人非有骨肉之親其施爲之不相關猶越人視秦人之肥瘠而大國混玉石於焜火遷赫怒於無辜仁主懷綏之道果如此耶倘以大國之賜一一還于舊業則莫大之事非獨孤之感其德先君貞茂之靈亦當結草也又得崔公今茲正月之書云對馬島隸於慶尚道考之史籍訊之父老實無所據然而大王若修文德以篤恩惠則誰敢不歸昔紂之無道億兆之衆皆倒其戈周公之盛越裳氏重九譯而至不必仍其舊顧其德如何耳但希諸公推孤區區之忱達于天聰前之所賜篆字甲名今印寫以爲信符辰下嚴寒各乞爲國保重國家以書辭不恭不禮待其使却其所獻禮物○已亥視事○上遣禮曹佐郎朴頌賜祭于吉昌君權跬曰脩短之璣關乎天雖賢智者莫遁哀榮之數載在禮於存沒乎何殊惟卿簪履名家文章世胄氣和而體邃志老而識清爰蒙上聖之知遂成館甥之禮秉忠誠而有守處富貴而益謙方

期琴瑟偕和式衍濬源之慶豈意伉侶夙喪遽貽鰥曠之憂每當接見之時常有悽悲之念惟幸兩兒之尚存待見成人乃何三紀之未周奄爲異物忽聞來訃良惻予心茲將菲薄之儀俾奠總帷之側於戲君臣義重堪嗟一體之相睽婚媾情深更慰貞魂於不寐○宣旨奪前萬戶安權其子用仁及義禁府都事崔珉告身從願配之都事李文幹以功臣之子但罷其職前此安權以萬戶不能禦倭當收告身權不以告身納官授其子用仁令納之用仁幸義禁府不即收奪因循不納珉與文幹以義禁府掌務不詳檢收奪至是事覺皆得罪○禮曹語宗貞盛使人仇里安曰都都熊瓦何以不見回禮使乎曰回禮使專是通信本國不干我島故不見且賊船之作耗邊邑本非島主所知干犯天誅理宜掃蕩其商船十三隻本無賊心並被拘留若 聖慈發還則當堅禁賊船永通交好且貞盛常言貞茂生時厚蒙 聖恩身死之後遣使致賻 聖恩罔極欲遣一二百人宿衛但以隔海異域不得如心伏乞照恕禮曹問曰來書稱無罪三百餘人被留被留人數本不至三百且與賊船一時出來窺覘虛實豈得無罪國人爲賊所害者幾三百餘人被虜在汝島者亦幾三百比有何罪乎爾不顧此反出如此之言乎仇里安曰島

主年少不學請人作書其間豈無錯誤當以此意達於島主禮曹問曰  
來書有平道全係累之言道全從仕本朝官至上將自作罪咎故安置于  
外其妻子並給口糧仇里安曰道全本以貞茂代官宿衛今以見黜故  
疑以本道之故得罪耳非有他也禮曹問前書云對馬島隸於慶尚道  
之語考之史籍訊之父老實無所據本島之隸於慶尚古籍昭然且汝  
島使者辛戒道亦言本島本為大國牧馬之地故前此汝島凡事皆報  
慶尚道觀察使以聞以此也朝廷非欲爭汝土地也仇里安曰本島之  
屬於慶尚道已之所不知戒道豈能獨知乎必是妄言也假使本島雖  
屬於慶尚道若不撫綏必外於聲教本雖不屬若撫之以恩誰敢不服  
對馬島日本邊境攻對馬島是攻本國也故小二殿以通好大國與否  
俱奏御所答以任意爲之故島主遣我來貢禮曹承宣旨而問也○庚  
子以同知摠制趙啓生爲千秋使○上患醫不精其業命前直長李孝  
之等數人始讀醫書于禁內○辛丑 上朝豐壤宮○領議政柳廷顯  
等設誕辰祝壽齋于興夫寺○壬寅 上在豐壤宮○命停誕日賀禮議  
政府率百官詣昌德宮獻鞍馬通手帕各道觀察使節制使等上箋賀  
獻方物 上王以 上之誕辰設宴于水閣諸王子政府六曹判書谷山

君延嗣宗礪山君宋居信都摠制洪敷兵曹參判李明德知申事金益  
精等侍宴至昏乃罷○宣旨奪宦者黃稻告身配其鄉旣山嚴永壽令  
內侍府治罪以宦官韓古文盧韓等服喪時及終制還入番時稻等俱  
不啓也○癸卯 上還宮○甲辰視事○饋諸道進箋差使負于禮曹  
常典也○上謂知申事金益精曰 啓聖殿朝夕奠具恐不精潔令禮  
曹判書親自點檢以聞○禮曹啓大臣致祭儀及策贈儀致祭儀曰前  
期忠扈衛於喪家大門外之西設使者幕次執事者設使者致奠位於靈  
前讀祭文位于靈左喪主以下立位于靈右北向主婦以下立哭位于  
殯北幔下至期使者至喪家入幕次內外表服司儀一引喪主以下  
俱就位立哭司儀引使者出次立於門西東面執事者陳饌於使者東  
南當門北向西上司儀引喪主去杖免經止哭出迎於大門之外復先  
入就位司儀引使者入就致奠位執事者以饌入升設於靈前同儀引  
使者詣香案前贊上香祭酒使者立上香立祭酒訖復位祝史外取祭  
文立讀訖奉祭文就燎所焚訖使者出喪主拜送于大門外杖哭而入  
○策贈儀曰前期忠扈衛於喪家大門外之西設使者幕次南向執事  
者設使者位於正廳東北南向喪主代授謚號位于廳前北向至期

使者以樓子奉謚弔至喪家先是奉常寺以其實跡議謚報禮曹禮曹移吏曹吏曹受教定謚入幕次

內外表服司儀一引喪主就位立哭司儀引使者出次立於門西東

面司儀引喪主去杖免經止哭出迎于大門之外執事者舁樓子入置

于廳正中南向司儀引使者立于東北司儀引喪主入拜位司儀唱鞠

躬四拜興平身喪主鞠躬四拜興平身使者稱有旨司儀唱跪喪主跪

使者宣旨曰殿下遣某官姓名賜故某官姓名謚曰某宣訖司儀唱

俯伏興四拜興平身喪主俯伏興四拜興平身使者於樓子取謚號授

喪主喪主跪受奉置于靈座前行焚黃禮用紅紙○乙巳以權維判右軍

都摠制府事致仕曹備衡工曹判書郭承祐中軍都摠制李種善右軍

摠制金月下中軍摠制曹致刑曹叅判趙璿嘉善大夫漢原君維淑恭

宮主金氏之外祖也○上以 上王不豫亟詣豐壤宮○吏曹啓今後

自三月至六月考滿守令家屬正二月內先上送新差守令家屬八月

下歸永為恒式 從之為農時迎送有弊也○龍見于慶尚道伽倻津

○丙午 上在豐壤○兵曹啓大閱日百官分隸中衛五所議政府敦

寧府諸君府吏曹兵曹承政院司憲府司諫院三軍鎮撫所則各率所

屬諸司隸於中所禮曹率所屬隸於左所刑曹率所屬隸於右所戶曹

率所屬隸於前所工曹率所屬與漢城府隸於後所從之時始習陳  
圖兵曹啓犯令軍士通政以下直斷從之○上曰出狩未還間農務  
及賑濟等事姑取領議政區處施行其餘還宮後乃啓○忠清道觀察  
使啓恭靖大王孽子加伊到竹山縣言父王升遐後寓於舅飯監  
申自家去年爲僧遊廣州諸寺今聞上王欲令還俗借人馬僕將上謂  
上命給傳上京令申白護養之○丁未上還宮○戊申視事○焚  
齊陵外山虫自前冬至春食松葉不能勝捕焚之內山發民捕之○對  
馬島左衛門大郎遣人獻龍腦四兩犀角二斤華鼓八十斤肉苳蔻三  
十斤回賜絲布七十匹○本贊成尹抵妻浴于平山温井令黃海道觀  
察使給米豆十五石○工曹啓九進上器皿不用心堅緻造作緣此不  
以破毀今後於器皿底書造作匠名以憑後考其不用心者徵其器皿  
從之○己酉雨雹○百官遙賀聖節樂懸而不奏上以方在期年之  
內不與○上王違和欲如伊川温井上將扈駕朝豐壤宮○上王命  
禮曹謂仇里安曰汝書辭不恭不得啓達若能誠心歸順則待之如舊  
又命其所齋私貨許令貿易而還○庚戌禮曹啓謹稽禮經凡十筮日  
喪事先遠又云練筮日自今凡父在爲母者練祭乞依此制先遠日

揮之從之○上王將幸伊川溫井 上從之是日次于永平縣之窟

洞 上王於路上見民以牛載糞結絡繹不絕云將飼司僕馬謂兵曹參判李明德曰司僕馬幾盡來於此其在京中者令司僕刈生芻養飼可也時當農月民皆務農何使之遠輸以廢其業乎明德曰不即移文於觀察使減其舊數臣等之罪也遂命行幸還京前令司僕刈芻飼廐馬○辛亥次鐵原驅高石亭下遣人獻所獲禽于 宗廟文昭殿廣孝殿

恭靖大王魂殿又分賜政府六曹○遣兵曹錄事趙審往視伊川溫井審來啓道路隘狹灘水險惡大駕不宜往乃止○壬子驅鐵原西山夕

次平康○癸丑驅分水嶺夕次平康○甲寅駕還驅黔勿洞之源夕次鐵原淮陽民得銀器於田中以獻○乙卯次三歧是日上護軍李君實大護軍韓方至等密啓於 上王曰軍士羸糧未盡今日可畋於江華

平 上王深納之夙駕深入朔寧之地五十餘里夜分乃還大駕迷路

衛士相失鐵原民朴小古未燃炬指路其妻攢手歎曰 君王失路誠

可痛心遂以炬授從臣以是得尋行宮而至 上王悔之謂趙末生曰

若知道路險阻當畋於近郊何不告予而使軍士疲困乎末生曰臣未知

道路夷險遠近君實方至素知其地阻險矇矓上達請皆痛懲二人知

上王旨意皆逃匿 上王曰君實等自知其罪而逃匿姑赦之二人  
俱以田獵得幸○丙辰次永平置酒扈駕大臣侍言及迷路事 上王  
驛召朴小古未賜米豆五石○丁巳 兩上還豐壤宮命兵曹饋扈駕  
諸臣○戊午千秋使趙啓生如京師百官以朝服拜箋賜啓生衣服笠  
鞞○上還宮議政府六曹詣闕問起居 上使宦者李村傳旨曰練祭  
擇日之法若用家禮當從卜筮若遵帝王故事必有消日之例柳廷顯  
李原等對曰文公家禮士大夫之禮也帝王故事必有消日之例不可  
別建卜筮卜季良曰參用家禮筮日亦可 上從廷顯等議○賜冰于  
讓寧大君禔每日一丁自五月至七月而止○禮曹判書許稠等啓  
恭靖大王柩祭之期將至而五室內祧遷之制藏主之所稽諸歷代制  
度各異誠有可疑謹條列以聞請令二品以上及侍從臺諫集議施行  
一宋神宗以僖祖王跡所基復奉神主于太廟遷順祖藏夾室程子朱  
子以爲得禮今以 穆祖爲始祖而仍居第一室遷 翼祖藏夾室則  
穆祖以王跡所基萬世不遷而 翼祖以下祧遷之主以子孫附於祖  
廟大順也然當 太祖親盡之日 太祖創業之祖不可遷毀高曾祖  
禰親未盡亦不可以遷毀是則爲六廟有違於諸侯五廟之制矣一唐

德宗遷獻懿二祖于德明興聖廟宋寧宗別建四祖殿於大廟大殿之西以奉祧遷僖順翼宣追尊之主孟冬祫享先詣四祖殿行禮歲令禮官薦獻若依唐制則穆祖可祔於始祖之廟無有如德明者若依宋制別建廟室於大廟之西奉祀遷祖則非古者宮廟即遠有毀無立之意也且疑於九廟矣又立廟而祭追崇之始祖則疑於禘矣儀禮經傳通解續云禮不王不禘王者禘其祖之所自出以始祖配之諸侯及其太祖一王制曰諸侯五廟二昭二穆與太祖之廟五漢元帝建昭元年丞相韋玄成等奏太上皇廟主親盡宜瘞園奏可唐玄宗開元十年中書令姚元之吏部尚書宋璟以爲義宗追崇之帝不宜列昭穆而其葬在洛州請又別廟于東都而有司時享其京廟主藏於夾室前朝太祖以上無遷主所藏處唯太祖之禰追尊爲世祖祭於陵所太祖以下遷主皆奉祀於諸陵署若依上項之制追王之祖奉祀於陵所則有合於姚宋之說而宗廟之制無違於王制諸侯五廟之制矣又朱子曰古者諸侯皆得祭始封之君以上則不敢祭然太祖創業之初追崇四代今三十年矣一朝親盡而其神主瘞之誠有所不忍又無可藏之處上下其議於廷臣○已未視事戶曹判書李之剛啓曰今年麥始熟民

食可繼請罷賑濟 上曰年麥雖熟予恐民有飢餓者其令守令親審  
民之資產如有飢餓者賑之○遣前判官金貴隆採銀于平安道○司  
憲府啓李貼爲旌義縣監時愛濟州官妓盜給官物又以私貿易遣商  
船于羅州遭風敗沒溺死者二十餘人贓罪雖在赦前使人溺死不可  
不懲請依大明律過失殺條徵贖均給死者之家 上從之○金加勿  
金沙安金乃巨等男婦五人自遼東逃來元係本國江界人逃往遼東  
爲東寧衛軍復思鄉土逃來 上以雖是本國人乃上國付籍軍丁遣  
判承文院事曹崇德解送于遼東○有年十一歲童子元吉者早喪父  
母居盈德聞有妹在豐壤來尋至離宮之側孝寧大君補見之啓于  
上王上王憫之命饋之卽送于京 上令有司給衣食養之○庚申兵  
曹啓前定吹角令有未盡處今與議政府同議以啓一 上王在行在當  
出令時先以晝烟夜火通諭次下宣旨于留都兵曹留都堂上卽啓于  
主上殿命內吹角人吹角一通兵曹應之以角又分登四方高處  
以軍士畢會爲限吹之外吹角聲初發時壽康宮入直軍士把門及考  
察鎮撫一二外具兵甲直詣行在若中軍入直則左軍及出番內禁內  
侍別侍忠義衛左司禁以上節制使軍官及時波赤等隨其聞角聲先

後依壽康宮入直軍士例直詣行在 主上殿命兵曹堂上授宣字旗  
立於昌德宮門外次殿內入直三軍鎮撫各以其軍之旗立於定所右軍  
及元係侍衛各軍士等即具甲兵詣昌德宮門外立於其旗之下若左  
軍或右軍入直則中軍詣行在所 主上召當爲將帥者三人授三軍  
織文旗受旗而出就其軍立之聽兵曹號令議政府六曹宗親勲舊時  
散二品以上應合赴急者除有故外昌德宮門外依幕聚會待命軍士  
畢會則 主上殿率上項軍士及議政府六曹宗親勲舊時散二品以  
上即詣行在別作一陣待命司僕寺軍器監義禁府外留都各司待  
主上殿動駕後各具兵甲各於昌德宮門外依幕聚會待命其餘各件  
一依在前吹角令兩殿在城內吹角時 主上殿無宣字旗及三軍織  
文旗 上王殿在行在所 主上殿在城內先吹角則 主上殿聚會  
軍士及 上王殿行在所赴急軍士依上項詳定數聚會 上王殿待  
軍士畢會赴急應變依在前吹角令一 兩殿在行在當出令時先以  
晝烟夜火通諭次下宣旨留都兵曹留都堂上即啓于 恭妃殿出召  
字旗立於行在之方若行在東則東大門西則南大門而吹角餘皆倣  
此又分登四方高處吹之角聲初發時 主上殿當直大小軍士及二

軍鎮撫等即具兵甲各門堅守出番各軍摠制各衛節制使以下元係侍衛各軍士隨其聞角聲先後即具兵甲詣於召字旗下兵曹率先到軍士即詣行在後到軍士次次奔走赴急其餘條件一依前詳定吹角令召字旗常時入內臨時啓出一上在行在吹角時三軍分運中車在行在闕門南左軍在闕門東近北右軍在闕門西近北 主上殿中軍之後別作一陣政府六曹宗親勲舊時散二品以上又於主上殿結陣之後各以衙門別處屯聚議政府屯聚處有標旗 上王從之

世宗莊憲大王實錄卷第十一

世宗莊憲大王實錄卷第十二

五月壬戌朔日暈○平安道都觀察使金漸以成川都護府使李胥辭狀移牒吏曹曰胥性本昏愚處事多闕酷刑厚斂不可臨民吏曹啓曰胥誠如此則即當罷黜今乃因辭免而陳其所犯漸亦當治罪 不允

○癸亥 上王患痢 上詣豐壤宮 上王欲入京觀石戰戲朴嘗曰恐勞聖體 上王曰石戰予之所樂觀也若觀此戲安知疾之愈也○

甲子 上在豐壤宮○慶州民孫千金妻一產三男賜米穀○上王遣兵曹參判李明德募石戰人數百分爲左右隊○乙丑 上奉 上王還自豐壤 上王御蓮花坊新宮新宮至是始成政府六曹與昌寧府院君成石磷平陽府院君金承霆等詣新宮問起居 上王謂兵曹代言司曰今日予欲與 主上觀石戰 主上固辭予以爲去春講武亦與偕行今觀石戰非戲事乃是武才也且予獨往則寂寥無與談論卿等之意以爲何如兵曹判書趙末生等啓曰臣等之意亦然 殿下獨往而 主上不從行實爲未便 上不得已奉 上王幸鍾樓觀石戰宗親八直掄制兵曹堂上六代言侍觀樓上仍置酒左爲防牌三百餘人右爲擲石軍一百五十餘人擲石軍高麗所設而近年罷之今復牧

舊平且募人以充之指揮鼓噪而合戰防牌每不勝奔走搃制河敬復  
郭承祐權希達朴實上護軍李澄石大護軍安希福等率騎士擊之又  
奔北敬復中石傷髮朴實爲衆所擊力窮語人曰汝輩見我玉環子乃  
得免擲石軍又奪澄石所騎馬以進上王曰敬復等無乃大傷乎敬  
復等曰雖敗不傷強起上樓上王問防牌曰何故每不勝防牌等跪  
曰落照眩眼風塵滿面視石甚難故耳命易地而戰禁擲石令以杖相  
擊防牌又不勝上王曰防牌子以爲步卒之健壯者實是懦弱無勇  
者也選擲石軍四十餘人以助防牌當路而戰者但擲石軍而已防牌  
皆逃匿其子逃匿者但呼噪以助聲勢耳上王下令曰被擊顛仆者  
慎勿再擊以致死傷且命醫視傷者救之抵暮而罷上奉 上王至  
新宮還御昌德宮政府六曹詣闕問安上曰予疾已差今日 父王  
謂予曰近患宿疾腰下蹇濕今乃乘馬而來其病稍愈予甚喜焉群臣  
皆賀○禮曹判書許稠謝曰臣患疾在家 殿下憐臣老病賜鞍子藥  
餌實是踰分之恩不勝感激上曰聞卿患疾予甚憂慮今聞疾愈予  
甚喜焉○丙寅 上王御鍾樓吹角軍士登時趨令結陣如令 上在  
昌德宮應之以角 上王命判兵曹事李原兵曹參議尹淮如昌德宮

迎待 上乃率昌德宮入直軍士以黑衣烏帶詣右軍之後 上王預  
令兵曹參判李明德賣牙牌出軍門迎入 上即下馬承命還上馬入  
軍門同御鍾樓觀之 上王親命李原趙洵李和英為三軍帥賜織紋  
旗軍士既聽令無敢失伍亂行者既而命解嚴仍觀石戰以擲石軍分為  
左右隊募善戰者充之左立白旗右立青旗為標相去二百餘步令曰  
毋敢越旗窮逐以奪旗為勝勝者厚賞左強右弱每不勝權希達河敬  
復與騎士擊之左軍固拒石如雨希達中石墜馬而走騎士憤之呼叫  
逐之左軍潰乃奪白旗以獻 上王召左軍牌頭方復生曰奪旗辱也宜  
更勦力復生等奮擊大勝置酒樓下奏樂宗親議政六曹判書等侍賜  
擲石軍酒肉賞絲布百匹正布二百匹楮貨四千張○丁卯 上朝新  
宮 上王還豐壤宮○戊辰日暈○上以昌德宮宮人多有疾病者乃  
與中宮移御景福宮初 上命於慶會樓東以散材作別室二間不用  
柱礎覆以茅草粧飭悉皆親命務令儉素至是不御正殿而御別室見  
戶外有藁席曰非予所命何以作此自今非予所命雖少物勿納于內  
○上王畋于抱川兵曹參判李明德參議尹淮都鎮撫延嗣宗河軍復  
等十三人扈駕○己巳視事○上王欲如永平以天時熱甚遂還豐壤

御水亭賜從駕群臣酒三品以上皆入侍○右議政李原等率三軍習

陣于盤松亭命同副代言韓惠賁宣醞慰之○禮曹啓元敬王太后

練祭儀曰前期一日忠扈衛設題主幄次於廣孝殿西階上東向有司

設牀席褥位香案於幄內奉常寺先造栗木主并匱體刺并如盛以箱

覆以帕安於腰輿詣幄次大祝奉安於褥位其日質明執事者設卓於

褥位東南西向具筆硯墨光采對卓置盥槃盥匱具者拭巾用白細設

盥洗於東階東南北向判通禮導殿下詣齋殿即座通禮門分引宗

室以下文武群官入就位文東武西中心為頭異位重行俱北向判通

禮導殿下出齋殿升自東階詣卓前北向立大祝盥手開匱奉出栗

主置於卓上以香湯浴主拭以巾卧置卓上題主官盥手升自東階詣

卓前西向立題云元敬王太后墨書訖以光漆重模之待墨書訖乃

退大祝奉主納于匱中安于褥位判通禮導殿下還齋殿通禮門分

引宗室以下文武群官以次出通禮門設殿下版位於東階東南西向

設亞獻官終獻官位於殿下版位之後近南西向北上執事者位於

其後異位重行俱西向北上設執禮位於東階西南西向謹者贊者贊

引在南小退俱西向北上若內庭窄則設贊者位於外庭東階西南西向設宗室以下文武

群官位於外庭文東武西中心為頭異位重行俱北向設監察位二於

東西班後北向書吏各陪其後典祀官率其屬奠祝板於靈座之右有

陳幣篚於尊所設香爐香合并燭於靈座前次設祭器實饌具設尊所

於戶外之左在玄酒皆加勺在罍北向西上設洗於東階東南北向在盥洗

在在盥洗在在東在罍在洗東加勺在篚在洗西南肆實以巾若爵洗之則又實以爵亞終獻洗又於

東南北向盥洗在在西在罍在洗東加勺在篚在洗西南肆實以巾若爵洗之則又實

以設諸執事盥洗於亞終獻洗東南北向大祝入設桑主座於靈座之

後奉桑主匱移安於座次奉栗木神主匱以入開匱奉出神主安于舊靈

座覆以青躬巾執禮率謁者贊者贊引先就殿庭拜位重行北向西上

四拜訖各就位贊引引典祀官大祝齋郎入就殿庭拜位立定執禮曰

四拜凡執禮有辭贊者亦傳喝典祀官以下皆四拜贊引引諸執事詣盥洗位盥悅

訖各就位通禮門分引宗室以下文武群官入就位謁者引亞獻官終

獻官入就位執事者詣爵洗位先瓚拭瓚洗爵拭爵置於篚奉詣尊所

置於站上禮曹判書進當齋殿前俛伏跪啓請行禮啓訖俛伏與判通

禮導殿下出齋殿詣版位西向立判通禮啓請四拜哭殿下四拜

哭盡哀執禮曰四拜哭在位者皆四拜哭盡哀先拜者判通禮導殿

下詣盥洗位北向立內侍跪取匱興沃水又內侍跪取槃承水 殿下

盥手內侍跪取巾於篚以進 殿下悅手訖內侍受巾奠於篚判通禮導

殿下升自東階近侍內侍從升詣尊所西向立執尊者舉羣酌鬱鬯近侍以瓚

受酒判通禮導 殿下詣靈座前北向立啓請跪近侍一人奉香合近

侍一人奉香爐跪進判通禮啓請三上香近侍奠爐于案近侍以瓚跪

進判通禮啓請執瓚灌地訖以瓚授近侍近侍受以授大祝近侍以幣

篚跪進判通禮啓請執幣獻幣以幣授近侍奠于靈座前允進香進瓚

西向奠爐受瓚奠幣皆在判通禮啓請俛伏興小退再拜哭導 殿下

降自東階復位小頃判通禮導 殿下升自東階詣尊所西向立執尊

者舉羣酌酒近侍以爵受酒判通禮導 殿下詣靈座前北向立啓請

跪近侍以爵跪進判通禮啓請執爵獻爵以爵授近侍奠于靈座前判

通禮啓請俛伏興小退北向跪大祝進靈座之右東向跪讀祝文訖判

通禮啓請俛伏興再拜哭導 殿下降復位謁者引亞獻官詣盥洗位

北向立盥手悅手訖謁者引亞獻官升自東階詣尊所西向立執尊者

舉羣酌酒執事者以爵受酒謁者引亞獻官詣靈座前北向立贊跪執

事者以爵授亞獻官亞獻官執爵獻爵以爵授執事者奠于靈座前謁

者贊俛伏與小退再拜哭引降復位謂者引終獻官行禮如亞獻儀引降復位判通禮啓請四拜哭 殿下四拜哭盡哀執禮曰四拜哭在位者皆四拜哭盡哀禮曹判書跪啓禮畢落訖俛伏與判通禮導 殿下

還齋殿謂者引亞獻官終獻官出通禮門分引陪祭群官以次出贊引引典祀官以下諸執事俱復拜位立定執禮曰四拜典祀官以下諸執事皆四拜贊引以次引出大祝納神主如儀執禮率謁者贊者贊引就

拜位四拜而出典祀官率其屬徹禮饌祝幣瘞於坎本殿官負以腰輿奉桑木主旨宗廟階前埋之通禮云廟殿北廡下兩階之間群官移班近東班首進名

奉慰亞獻官正一品終獻官正一品典祀官奉常判事有故則尹執禮一品大祝一外祝史二五品齋郎二五品謁者一六品贊者二通禮門判官通贊贊引一祭外○庚子

上朝豐壤宮○辛未日暈○上還宮○壬申視事時久旱 上曰上王常言旱氣太甚則暫不遊觀其憂旱之心至矣天何久不雨乎○以

李順蒙邊願為左軍摠制具成亮右軍摠制池伯顏左軍同知摠制李種善洪涉右軍同知摠制柳璋仁壽府尹成抑仁寧府尹柳思訥漢城府

尹仍以邊願為全羅道兵馬都節制使李順蒙慶尚道兵馬都節制使○封安氏為淑善翁主除其父檢校漢城尹義檢校判漢城府事○以

承文院所儲紙劄有剩餘權除慶尚全羅道所納紙劄○領議政柳廷顯請立限田均田之制復行戶牌之法 上曰待秋更啓○忠請道觀察使以忠州民飢請設慶源倉賑之 從之○癸酉雨○視事○甲戌視事○乙亥傳宗廟山陵等望祭香祝○兵曹啓大閱時大小軍士皆令環甲齊兵器別軍各賫火桶又二品以上帶軍職者分屬於五衛六曹及所屬諸司分屬於中外五所如左中衛議政府敦寧府吏曹兵曹代言司司憲府司諫院三軍鎮撫所各率所屬諸司都鎮撫崔閔德內禁衛節制使趙洵忠義衛節制使石根左所禮曹率所屬諸司中軍節制李湛別侍衛節制使朴矩右所刑曹率所屬諸司中軍都節制郭承祐別侍衛節制使權夔前所戶曹率所屬諸司中軍節制李興濟別侍衛節制使韓長壽後所工曹率所屬諸司漢城府中軍同知節制田興忠義衛節制使趙大臨以上中衛各所分屬軍職二品以上外諸司大閱及常時隸習皆不與焉左衛中所左軍判府事李和英中軍節制李春生內侍衛節制使宋居信左所左軍都節制李澄忠義衛節制使南暉右所右軍節制申浩忠義衛節制使趙叙前所左軍節制李興發後所左軍同知節制李種善右衛中所左軍判府事朴子青右軍同知節

制尹夏左所右軍都摠制洪敷中軍僉摠制沈寶右所右軍摠制柳殷  
之前所別侍衛節制使王麟左所右軍同知摠制尹得洪前衛中所內  
禁衛節制使曹備衡右司禁節制使文貴左所中軍摠制金月下右司  
禁節制使洪海右所右軍同知摠制元閔生前所左軍同知摠制池伯  
顏後所別侍衛節制使朴芷後衛中所右軍都總制權希達中軍同  
知摠制李叔敏左所中軍同知摠制許權右所別侍衛節制使朴成陽  
前所中軍摠制朴光衍後所右軍同知摠制洪涉以上軍職二品以上  
隸習陳圖 上王從之○丙子 上親祭廣孝殿○朝豐壤宮○丁丑  
上王命停詆日賀禮只受表裏鞍馬○上上壽宗親駙馬議政府堂  
上六曹判書谷山君延嗣宗判府事李和英禮曹參判河演兵曹參判  
李明德都摠制洪敷知申事金益精等侍宴極歡日没而罷○宣旨朝  
廷使臣慰宴外母令宰馬○還給李安遇金廷俊等五十二人告身  
上爲 上王生辰欲布寬息乃命在前收職牒者若非關係 宗社並  
今還給○戊寅 上在豐壤○已卯 上奉 上王幸樂天亭大閱五  
衛陣前此 上王命參贊卞季良考據古制以成陣法 上於內中又  
出畫本陣法一軸季良參究爲五陣法以進令訓鍊觀依法教隸至是

三軍變爲五陣無失次者既閱仍觀手拍之戲置酒奏樂慰三軍將帥  
宗親駙馬議政府堂上李和英延嗣宗趙未生金益精等侍宴○庚辰  
上王還豐壤 上還宮○囚僧尚強于義禁府強堂弟僅適休與其  
徒信乃等九人住平安道香山乘桴渡鴨綠江逃入遼東上書于都司  
曰貧道等在本國金剛山五臺山妙香山等諸山適相棲身以松皮草  
根爲糧以松絡木皮爲衣勤修道業以爲曷日曷月親拜聖帝蒙被聖  
恩安修道業如熟思今誓願載天幸開天門得結桴渡江今三月十四  
日始到此土如墜長空而乘靈鶴溺巨海而遇方舟其爲歡喜曷勝道  
哉貧道片無錢物惟陪法寶定光如來舍利子二枚本國王師懶翁和  
尚舍利子一枚進獻伏願大人俯照某等之意聞於 帝所助揚佛法  
都司送詣京師其意欲訴本國不崇佛法而依大明以興行其道也○  
辛巳視事○上謂金益精曰聞知海豐郡事及竹山縣監妻子欲以私  
僕從赴任其令吏曹從其自願今後又有如如者吏曹啓達施行○上  
命金益精問於卞季良曰今卿所撰陣說內應敵之際後衛先出應敵  
及觸處爲先之說似皆拘於一偏予意以爲中衛主將臨時布置或前  
或後或左或右從其主將之指揮可也季良曰後衛先出之說出於五

陣本法觸處爲先之說亦出於諸家陣法皆不可廢請兩存其說上  
曰予之所言卿之所言具書以進予將啓于父王季良書二條以進  
遣尹淮啓于上王○命朴訔更定大闕制度○命除諸司奴婢之爲  
疾廢疾者貢因戶曹之啓也壬午視事○囚僧信行于義禁府適休  
之弟子也○禮曹啓元敬王太后山陵練祭依山陵四時大享例  
從之○吏曹判書孟思誠啓曰昨日下午旨知海豐郡事竹山縣監妻子  
許令從自願以私僕從赴任此事朴訔曾令本曹啓達臣等恐因此生  
弊未敢啓達上曰卿之所言因此生弊予於昨日已言之此二守家  
屬姑從自願下送然此法已立非惟緣此生弊儻或皆以私僕從赴任  
則非所以勸士之道也其守令妻子當農月自願下歸者毋得啓達然  
親有疾而子往見之夫有疾而婦往見之人倫之大者不可不聽○命  
罷右正言李壅職初壅爲監察分臺於禮賓寺給羊猪鴈鴨料濫給米  
十石憲府請以監守自盜論特命贖杖九十○癸未視事○咸吉道兵  
馬都節制使請移龍津牧場萬戶於曹至井浦從之○乙酉囚適休  
妹督李克于義禁府○丙戌傳獻陵練祭香祝上王以完山府院君  
李天祐子完犯不孝之罪命以孽子完屬忠義衛○丁亥上率百官

詣廣孝殿行練祭○上朝豐壤宮○戊子 上在豐壤○通事林密回  
自京師言以三月二十八日至北京 帝以風痺不視事已久 太子  
受朝四月初八日夜大雨震電至翌日曉奉天華蓋謹身等殿災須臾  
而盡即日大赦至十三日詔曰比者上天垂戒奉天等殿災朕甚警懼  
不遑自安今禮部以朕初度之辰奏請奉賀甚非所以敬謹天戒而益  
重朕之不德焉其止勿賀密又言還至山海衛逢本國僧信乃等九人問  
其所之一僧云向北京餘皆不答○上王曰 主上萬幾之煩不可累  
日留此宜速還但今雨不止不可着蓑以行姑令經宿○己丑 上還  
宮○上王命每歲番初日中月中兵曹堂上入番宰樞於茅亭或水亭  
入啓事○庚寅視事○六月壬辰朔 上將親祭廣孝殿以大雨而止  
○禮曹啓大閱儀曰九月十月中大閱於都外用剛日前期十一日兵  
曹請大閱承教遂命將帥簡軍士有司先芟萊除地爲場方一千二  
百步四出爲和門門又於其內爲步騎軍營域處分兩陣東西相向  
中間相去三百步每五十步立表爲一行凡五行表間相去各五十步  
爲軍士進止之節又別墀地於北廂南向爲車駕停觀之所前二日忠  
扈衛設大次及御座於其中又設小次於大次之東隨地之宜通禮門

設宗室以下文武群臣拜位於大次之南如常儀前一日將帥及士卒  
集於壇所禁止喧嘩依方色立旗為和門旗鼓甲仗威儀悉備於壇  
所大將以下各有統帥如常式將帥先教士眾望聽旋旗指揮之蹤  
即晚奠金鼓動止之節鳴金即止大閱日未明時十刻軍士皆嚴備騎徒  
皆貫甲各為直陣以相候將軍及大將軍各依儀立於旗鼓之下其日未  
明七刻槌一鼓為一嚴有司啓開宮殿門及城門未明五刻槌二鼓為再  
嚴判通禮啓請中嚴宗室以下文武群臣皆具甲冑有司陳小駕儀仗未  
明二刻槌三鼓為三嚴諸侍衛之官各服其器服車駕動宗室以下文  
武群臣侍衛如常儀車駕至壇所兵曹判書甲冑乘馬奉引入自都壇北  
和門至小次前下馬入次通禮門分引宗室以下文武群臣入大次之南  
文東武西中心為頭異位重行俱北向立定殿下被金甲出小次入大次  
即座繳扇儀仗如常儀通贊唱再拜在位者皆再拜中軍將偃旗軍士各  
於其陣北向再拜舉旗騎上馬徒起訖兵曹判書祭判停立於東廂西向仗  
儀小退以通觀路侍臣依左右廂立於大次之前東西北上文武九品以上文  
東武西在侍臣之外十步重行北上立定吹大角三通中軍將各以鞞令鼓二  
軍俱擊鼓有司偃旗騎下馬立徒跪二軍諸將上護軍以上各集於中軍大

將旗鼓之下左廂中軍大將立於旗鼓之東西面諸軍將立於旗鼓之南北  
面東上右廂中軍大將立於旗鼓之西東面諸軍將立於旗鼓之南北面西上  
以聽誓大將誓曰今行大閱以教人戰進退左右一如軍法用命有常賞不用  
命有常刑可不勉之誓訖左右軍伺候各二人振鐸分循以警衆諸上護軍  
各以誓辭遍告其所部遂聲鼓有司舉旗騎上馬徒起皆行及表擊鉦騎  
徒乃止又聲三鼓有司偃旗騎下馬徒跪又擊有司舉旗騎上馬徒起騎驟徒  
趨及表乃止整列位定東西軍依五行相勝之法互為陣以應之每變  
陣各選刀楯之士五十人挑戰於兩軍之前第一第二挑戰迭為勇怯  
之狀第三挑戰為敵均之勢第四第五挑戰為勝敗之形五陣畢兩軍  
俱為直陣又擊三鼓有司偃旗騎下馬徒跪又聲鼓舉旗騎上馬徒起  
騎從徒走左右軍俱至中表相擬擊而還每退止一行表如前遂復其初  
凡相擬擊皆不得以刃相及凡步士逐還過中表二十步而止騎士不在此例判通禮跪啟大閱禮畢 殿下  
降座入小次釋金甲兵曹承教軍士外百官皆釋甲 殿下還大次即  
座進茶床如常儀畢判通禮啟請還宮 車駕還宮如儀○癸巳視事  
○以朴成陽為慶尚道兵馬都節制使朴光衍忠清道兵馬都節制使  
權蔓全羅道兵馬都節制使○咸吉道都觀察使申商啟高山驛丞所管自

高山至德山相去五百八十二里施利驛丞所管自新息至懷綏相去  
六百五十里兩丞所管遙隔難以巡察自高山至青山二十一驛爲高  
山道自施利至懷綏十二驛爲懷綏道自酒泉至居山二十一驛爲酒  
泉道加置酒泉道驛丞從之○禮曹啓 太祖大王柎廟後設綵棚歌  
謠然非古制今 恭靖大王柎廟時宜除此禮且路次儀仗將 太祖  
柎廟時儀仗量宜增減紅陽繖一紅蓋二青蓋二龍扇二鳳扇二紅門  
大旗一白虎旗一白澤旗二玄鶴旗一白鶴旗一青龍幢一白虎幢一  
朱雀幢一玄武幢一金粧刀一銀粧刀一紅繡鞍六馬六匹錚一鼓一  
兩部樂仍舊孔雀扇四內減二中旗十六內減四稍旗三十內減十金  
銀骨朶子各三內各減一豹熊首朶子各六內各減二金鐙六內減二  
金銀所子各三內各減一從之○甲午視事 上問久雨無乃傷禾乎  
李原曰不至損傷○乙未日珥○視事○摠制姜淮仲奉賻米豆二十  
石常典也○光祿少卿李茂昌卒賻米豆一十石紙七十卷茂昌文命之  
子其妹入侍 帝宮○丙申 上王御茅亭視事○上視事○兵曹啓  
別司饗及各色掌同是賤口而別司饗則遷轉受職其餘無錄用之法  
未便自今仕多有才能者錄用 上王從之○丁酉視事○禮曹啓新

舊官交付時坐次禮度一從本品交坐前銜官亦令著紗帽角帶同坐  
從之○刑曹啓大小人負所陳告公處漏落奴婢本曹即牒其司令載  
續案而諸司不即載錄或至脫遺今後令都官檢察俱報本曹啓聞論  
罪從之○慶尚道觀察使啓道內州郡急唱或以官奴或以鄉吏或以  
百姓例皆不同請並以官奴爲定 上王從之○戊戌視事○大雨如  
注水漲平地數尺豐壤侍衛軍營幾至漂溺○己亥雨土濛昧○庚子  
視事 上以久雨傷禾爲慮○遣宦官李村往豐壤宮問起居以大雨  
連日川水漲溢 上不能朝故也○刑曹啓刑者人之死生係焉不可  
不慎中外掌刑者於笞杖並用較板獨於訊杖不用前此義禁府造樣  
子布中外今因年久不復考其同異律文內獄具圖有訊杖刑制以其  
犯重罪贖證明白不服承招者臀腿分受故刑制重大惟我本朝不問  
罪之輕重凡情狀不服者皆用訊杖故獄具圖訊杖刑制亦不可一從  
然無較板大小不同有違於 殿下慎刑之意自今義禁府及本曹常  
用訊杖參酌造較板布中外從之訊杖形制長三尺三寸內一尺三寸  
以上圓經七分二尺以下方廣八分厚二分○以宦官金龍奇養不潔火  
堵安善爲子入仕禁中命歸其家未幾召之○吏曹啓京官與外官換

差者及外官自相換者相往還受解由其弊者小今後京官與外官相換則京官眼同同任官反庫磨勘成置解由文契赴任外官交代者亦受解由上京前官解由傳報所掌官若有錯誤者并錄以報外官自相換者若一二月程途則相往交割若程途遙隔則秩高者具其辭緣傳報觀察使差隣官守令眼同反庫磨勘解由文契成置即赴任所依例交割交代者受解由到任前官解由傳報觀察使如有錯誤并錄以報從之○刑曹啓商賈之徒出入倭館汎濫貿易故立防禁之法收奪所持之物依律治罪然罪至笞五十而又從願徵贖由是重利慢法以至通同外人今後潛行貿易者依大明律緇絹絲絲私出外境貨賣者杖一百物貨船車並沒官其通同情迹著見者依盤詰姦細條痛懲從之○黃海道觀察使啓今奉旨令道內諸鎮造防牌然圓防牌不過驚駭騎兵而已倭賊本不用騎請參造立防牌隨機應用從之○辛丑上王御茅亭視事 上視事○日本國九州摠管源義俊致書于禮曹判書獻疏黃一千五百斤銅九百九十斤蘇木一千斤明盤十斤沉香三斤十四兩芭豆十七斤八兩川芎十九斤九兩胡椒十九斤九兩吊元敬王太后之喪且請還對馬島被留倭人○禮曹啓 先王先后神

主犢體制底蓋皆方故納 神主安龕室時或前後倒錯請於底蓋前  
面朱書前字 從之○戶曹啓繕工監炭將盡願令州郡預納明年貢  
炭上曰今方盛農之時不可役民作炭始省其弊以待秋成乃命條錄  
用炭之數親以朱書減內用炭數十石仍令承政院計一年所用炭炬  
燒木之數可減者減之凡所減每一月炭百餘石一年燒木數十萬斤  
炬數千柄○禮曹啓曆象授時乃國家之重任今書雲觀諸述者或以  
閑散官差定未便今後述者不拘取才皆授官職 從之○宦者吉貴  
生宋貴等知安善不繁而不啓令刑曹鞠之○命禮曹餉漕轉押領差  
使負萬戶等仍命以爲恒式○兵曹啓濟州牧場馬日就矮小原究其  
由州人及商賈之徒於往來之際輒將體小馬放于牧場緣此孳息之  
馬並皆矮小請令過涉時所在守令嚴加覈察若有違者並罪守令  
從之○壬寅視事 癸卯大雨京城川渠汎溢下流於塞漂沒人家七  
十五哭聲相聞或有登屋攀樹以免者溺死者頗多 上軫慮命戶曹  
賻死者父母妻子○以邊處厚判定州牧事○乙巳親傳宗廟及諸陵  
香祝○遣宦者李村于豐壤宮問起居○禮曹啓高麗古今詳定禮云  
凡霖雨不已禁京城諸門門別三日每日一禁不止乃祈山川岳鎮海

瀆三月不止祈社稷宗廟若州縣禁城門祈界內山川今霖雨淹久損傷禾穀國門及州郡霖雨過多處請設禁祭從之○丙午上欲朝豐壤宮出興仁門外以雨甚水漲乃還○丁未視事○禁于四門○上朝豐壤宮時水潦猶盛舟渡松溪由山谷運路至離宮○戶曹以事務煩劇而皂隸每番只十五名請依前例有錢穀諸司日守奴各一名役使何如命皂隸每番各加五名○工曹啓都城內行廊或因雨漏或柱根埋地濕朽將至傾頽請令漢城府考察修補從之○宣旨累日大雨必有水災速撤水門箭防以通水道徵巡官及兵曹終夜巡視毋令致人於死○戊申再禁○上王與上同御茅亭視事亭甚窄惟趙涓趙末生尹淮金益精韓惠侍坐設小酌○禮曹啓本國僧信然信休洪適惠禪信淡洪惠信雲海丕適休等九人逃入遼東請奏還從之○芳幹女誠惠翁主信惠翁主等申訴曾命洪州給月料父及兄孟宗未適人女弟等咸賴此存活自四月父歿以後不給其料非惟父殯朝夕屢至空匱兄弟姊妹口糧不繼命依舊支給○己酉上在豐壤宮○以久雨減中宮用度教曰近者久雨傷禾天災可畏民生可哀其令京畿及外方各道停進上物膳祭享及饋餉他國使臣外禁中外用酒○義禁府啓逃

僧適休堂兄尚剛師僧處愚弟子信行信琦妹婿李克皆不知適休逃歸之狀請放之從之○庚戌 上還自豐壤○命戶曹曰霖雨太甚米價湧貴民生可慮其以軍資陳米一萬石買楮貨于民間貧乏人為先給之○右代言柳頰遭母喪遣宦者吊之賜贖紙百卷燭十柄○辛亥視事○宣旨自今兵曹司僕寺忠扈衛等諸司九千兵事馬政外悉令分兵曹啓 主上殿施行○禮曹啓祈晴時依祈雨例設岳鎮海瀆位於北郊望祈從之○禮曹啓元敬王太后初期稱太祥齋再期稱忌晨從之○刑曹啓吉貴生宋貴等罪命各杖八十沒為居鄉官奴○以判承文院事曹崇德為奏聞使請還逃僧○禮曹啓 恭靖大王祥祭禪祭攝行及親行儀其攝行祥祭儀曰再期前一日執禮設初獻官位於東階東南西向設亞獻官終獻官之位於初獻官之後稍南西向北上執事者位於其後異位重行俱西向北上設監察位於殿庭之南近東西向書吏陪其後設執禮位於東階西南西向謁者贊者贊引在南小退俱西向北上其日未行事前典祀官率其屬奠祝板於靈座之右有陳幣篚於尊所設香爐香合并燭於靈座之前次設祭器實饌具設尊所於戶外之左在玄酒皆加勺巘北向西上設洗於東階東南北向在盥洗

爵洗 巽在洗東加勺筮在洗西南肆實以巾若爵洗之能則又實以爵設諸執事盥洗

於獻官洗東南北向時至典祀官帥其屬入實饌具畢諸享官皆就殿門

外執禮帥謁者贊者贊引先就殿庭拜位重行北向西上四拜各就位

贊引引監察及典祀官大祝齋郎入就殿庭拜位立定執禮曰四拜九

禮有辭贊 監察以下皆四拜贊引引監察就位贊引引諸執事詣盥洗

位盥洗訖各就位大祝開匱奉出神主設於座先出大王神主覆以白

以青帝巾以西為上凡出主 執事者詣爵洗位洗瓚拭瓚洗爵拭爵置

於篚奉詣尊所置於站上謁者引初獻官贊引引亞獻官終獻官入就

位執禮曰四拜哭初獻官以下四拜哭先拜者 謁者進初獻官之左請

行禮謁者引初獻官詣盥洗位北向立盥手悅手訖引初獻官升自東

階詣尊所南向立執尊者舉冪酌鬱鬯執事者以瓚受酒謁者引初獻

官詣 靈座前北向立贊跪執事者一人奉香合一人奉香爐謁者贊

三上香執事者奠爐于案執事者以瓚授初獻官初獻官執瓚灌地訖

以瓚授執事者大祝以幣篚授初獻官初獻官執幣獻幣以幣授大祝

奠于 靈座前凡奉香授瓚授幣皆在獻官之左授爵奠幣在此 謁者贊俛伏

與小退再拜哭引初獻官降自東階復位小頃謁者引初獻官升自東

階詣尊所西向立執尊者舉罍酌酒執事者二人以爵受酒謁者引初  
獻官詣 靈座前北向立贊跪執事者以爵授初獻官初獻官執爵獻  
爵以爵授執事者奠于 大王靈座前執事者以副爵授初獻官初獻  
官執爵獻爵以爵授執事者奠于 王后神位前謁者贊俛伏興小退北  
向跪大祝進 靈座之右東向跪讀祝文訖謁者贊俛伏興再拜哭引降  
復位謁者引亞獻官詣盥洗位盥手悅手訖引亞獻官升自東階詣尊  
所西向立執尊者舉罍酌酒執事者二人以爵授酒謁者引亞獻官詣  
靈座前北向立贊跪執事者以爵授亞獻官亞獻官執爵獻爵以爵  
授執事者奠于 大王靈座前執事者以副爵授亞獻官亞獻官執爵  
獻爵以爵授執事者奠于 王后神位前謁者贊俛伏興小退再拜哭  
引降復位謁者引終獻官行禮如亞獻儀引降復位執禮曰四拜哭在  
位者皆四拜哭謁者進初獻官之左白禮畢謁者贊引各引初獻官以  
下以次出贊引引監察及典祀官諸執事俱復拜位立定執禮曰四拜  
監察以下皆四拜贊引以次引出大祝納神主如儀執禮率謁者贊者  
贊引就拜位四拜而出典祀官帥其屬徹禮饌祝幣瘞於坎 初獻官正  
一品亞獻官正二品終獻官從二品典祀官則判奉常寺事有故則尹

執禮四品大祝文官參外祝史二齋郎二謁者一贊者一贊引一並參

外○攝行禪祭儀曰第二十七日行前期一月執禮設初獻官位於東階東

南西向設亞獻官終獻官位於初獻官之後稍南西向北上執事者位

於其後異位重行俱西向北上設監察位於殿庭之南近東西向書吏

陪其後設執禮位於東階西南西向謁者贊者贊引在南小退俱西向

北上其日未行事前典祀官帥其屬奠祝版於靈座之右有陳幣並

於尊所設香爐香合并燭於靈座前次設祭器實饌具設尊兩於戶

外之左在酒皆加勺在簠北向西上設洗於東階東南北向盥洗在東

在洗東加勺在篚在洗西南肆實以巾若勺洗之篚則又實以爵設諸執事盥洗於獻

官洗東南北向時至典祀官帥其屬入實饌具畢諸享官皆就殿門外

執禮帥謁者贊者贊引先就殿庭拜位重行北向西上四拜各就位贊

引引監察及典祀官大祝齋郎入就殿庭拜位立定執禮曰四拜九執禮有

辭贊者皆傳唱監察以下四拜贊引引監察就位贊引引諸執事詣盥洗位盥

悅訖各就位大祝開匱奉出神主設於座先出大王神主覆以白苧巾

以西為上凡出主大王先出入則王后先入執事者詣爵洗位洗瓚拭瓚洗爵拭爵置於篚奉

請尊所置於坫上謁者引初獻官贊引引亞獻官終獻官入就位執禮

曰四拜哭初獻官以下皆四拜哭先拜者 謁者進初獻官之左請行禮

謁者引初獻官詣盥洗位北向立盥手悅手訖引初獻官升自東階詣

尊所西向立執尊者舉罍酌鬱鬯執事者以瓚受酒謁者引初獻官詣

靈座前北向立贊跪執事者一人奉香合一人奉香爐謁者贊三上

香執事者奠爐于案執事者以瓚授初獻官初獻官執瓚灌地訖以瓚

授執事者大祝以幣篚授初獻官初獻官執幣獻幣以幣授大祝奠于

靈座前

凡奉香授瓚授幣皆在獻官之左授爵奠爵准此

謁者贊俛伏興小

退再拜引初獻官降自東階復位小頃謁者引初獻官升自東階詣尊

所西向立執尊者舉罍酌酒執事者二人以爵受酒謁者引初獻官詣

靈座前北向立贊跪執事者以爵授獻官初獻官執爵獻爵以爵

授執事者奠于 大王靈座前執事者以副爵授初獻官初獻官執爵

獻爵以爵授執事者奠于 王后神位前謁者贊俛伏興小退北向跪

大祝進 靈座之右東向跪讀祝文訖謁者贊俛伏興再拜引降復位

謁者引亞獻官詣盥洗位盥手悅手訖引亞獻官升自東階詣尊所四

向立執尊者舉罍酌酒執事者二人以爵受酒謁者引亞獻官詣 靈

座前北向立贊跪執事者以爵授亞獻官亞獻官執爵獻爵以爵授

授執事者奠于 大王靈座前執事者以副爵授亞獻官亞獻官執爵

獻爵以爵授執事者奠于 王后神位前謁者贊俛伏與小退再拜引

降復位謁者引終獻官行禮如亞獻儀引降復位執禮曰四拜哭在位

者皆四拜哭謁者進初獻官之左白禮畢謁者贊引各引初獻官以下

以次出贊引引監察及典祀官諸執事俱復拜位立定執禮曰四拜監

察以下皆四拜贊引以次引出大祝納神主如儀執禮帥謁者贊者贊

引就拜位四拜而出典祀官帥其屬徹禮饌祝幣瘞於坎初獻官以下

諸執事官品與祥祭同○親享祥祭儀曰再期前一日忠扈衛設幄次

於魂殿前近東隨地之宜通禮門設 殿下版位於東階東南西向設

亞獻官終獻官位於 殿下版位之後近南西向北上執事者位於其

後異位重行俱西向北上設執禮位於東階西南西向謁者贊者贊引

在南小退俱西向北上若內庭窄狹則設贊者位設宗室以下文武群

官位於外庭文東武西中心為頭異位重行俱北向設監察位二於東

西班後北向書吏各陪其後其日未行事前典祀官帥其屬奠祝版於

靈座之右有姑陳幣篚於尊所設香爐香合并燭於靈座前次設祭器實

饌具設尊所於戶外之左在玄酒皆加勺簋北向西上設洗於東階東南

北向盥洗在東疊在洗東加勺盥洗在東篚在洗西南肆實以巾若爵洗之篚則又實以爵亞

終獻洗又於東南北向盥洗在東疊在洗東加勺盥洗在東篚在洗西南肆實以

巾若爵洗之篚則又實以爵設諸執事盥洗於亞終獻洗東南北向時至典祀官帥

其屬入實饌具畢諸享官及陪祭群官皆就殿門外執禮帥謁者贊者

贊引先就殿庭拜位重行北向西上四拜訖各就位贊引引典祀官大

祝齋郎入就殿庭拜位立定執禮曰四拜九執禮有辭贊者皆傳喝典祀官以下四拜

贊引引諸執事詣盥洗位悅訖各就位判通禮導殿下詣幄次即座

通禮門分引宗室以下文武群官入就位謁者引亞獻官終獻官入就

位大祝開匱奉出神主設於座先出大王神主覆以青苧巾以西為上九出主大王后先入則執事者詣爵洗位洗瓚拭瓚洗爵拭爵置於篚奉詣尊所

置於站上禮曹判書進當幄前俛伏跪啟請行禮訖俛伏興判通禮導

殿下出幄詣版位西向立判通禮啟請四拜殿下四拜哭盡哀執

禮曰四拜哭在位者皆四拜哭盡哀先拜者不拜判通禮導殿下詣盥洗

位北向立內侍跪取匱興沃水又內侍跪取盤承水殿下盥手內侍

跪取巾於篚以進殿下帨手訖內侍受巾奠於篚判通禮導殿下

升自東階近侍內侍從升詣尊所西向立執尊者舉罍酌爵訖近侍以瓚受酒

判通禮導

殿下詣靈座前北向立啓請跪近侍一人奉香合一人奉

香爐跪進判通禮啓請三上香近侍奠爐于案近侍以瓚跪進判通禮

啓請執瓚灌地訖以瓚授近侍近侍受以授大祝近侍以幣籠跪進判

通禮啓請執幣獻幣以幣授近侍奠于靈座前

凡進者進瓚進幣皆在東西向奠爐受瓚奠幣

皆在西東向進爵奠爵准此

判通禮啓請俛伏興小退再拜哭導

殿下降自東階

復位小頃判通禮導

殿下升自東階詣尊所西向立執尊者舉罍酌

酒近侍二人以爵受酒判通禮導

殿下詣靈座前北向立啓請跪近

侍以爵跪進判通禮啓請執爵獻爵以爵授近侍奠于

大王靈座前

近侍以副爵跪進判通禮啓請執爵獻爵以爵授近侍奠于王后神位

前判通禮啓請俛伏興小退北向跪大祝進靈座之右東向跪讀祝文

訖判通禮啓請俛伏興再拜哭導

殿下降復位謂者引亞獻官詣盥

洗位北向立盥手悅手訖謂者引亞獻官升自東階詣尊所西向立執

尊者舉罍酌酒執事者二人以爵受酒謂者引亞獻官詣靈座前北向

立贊跪執事者以爵授亞獻官亞獻官執爵獻爵以爵授執事者奠于

大王靈座前執事者以副爵授亞獻官亞獻官執爵以爵授執事者

奠于王后神位前謂者贊俛伏興小退再拜哭引降復位謂者引終

獻官行禮如亞獻儀引降復位判通禮啓請四拜哭 殿下四拜哭盡哀

執禮曰四拜哭在位者皆四拜哭盡哀禮曹判書跪啓禮畢啓訖俛伏

興判通禮導 殿下還帷次謁者引亞獻官終獻官出通禮門分引陪

祭群官以次出贊引引典祀官以下諸執事俱復拜位立定執禮曰四

拜典祀官以下諸執事皆四拜贊引以次引出大祝納神主如儀執禮帥

謁者贊者贊引就拜位四拜而出典祀官帥其屬徹禮饌祝幣瘞於坎群

官移班近東班首進名奉慰亞獻官以下諸執事官品與練祭同○親享

禋祭儀曰第二十七日行前期一日忠扈衛設幄次於魂殿前近東隨地之

宜通禮門設 殿下版位於東階東南西向設亞獻官終獻官位於

殿下版位之後近南西向北上執事者位於其後異位重行俛西向北

上設執禮位於東階西南西向謁者贊者贊引在南小退俱西向北上

若內庭者被設贊者位於外庭東階西南西向設宗室以下文武群官位於外庭文東武西中

心為頭異位重行俱北向設監察位二於東西班後書吏各陪其後其

日未行事前典祀官帥其屬奠祝版於靈座之右有陳幣篚於尊所設

香爐香合并燭於靈座前次設祭器實饌具設尊所於戶外之左在西皆

加勺罍北向西上設洗於東階東南北向盥洗在東罍在西罍在洗東加勺篚在

洗西南肆實以巾若爵洗之籠則又實以爵亞獻終獻洗又於東南北向盥洗在東

疊在洗東加勺籠在洗西南肆實以巾若爵洗之籠則又實以爵設諸執事盥洗於

亞終獻洗東南北向時至典祀官帥其屬入實饌具畢諸享官及陪祭

群官皆就殿門外執禮帥謁者贊者贊引先就殿庭拜位重行北向西

上四拜各就位贊引引典祀官大祝齋郎入就殿庭拜位立定執禮曰

四拜九執禮有辭贊者皆傳喝典祀官以下四拜贊引引諸執事詣盥洗位盥悅訖

各就位判通禮導殿下詣幄次即座通禮門分引宗室以下文武群

官入就位謁者引亞獻官終獻官入就位大祝開匱奉出神主設於座

先出大王神主覆以白苧巾次出王后神主覆以青苧巾以西為上凡出主大王先入王后先執事者詣爵洗位洗瓚

拭瓚洗爵拭爵置於籠奉詣尊所置於坫上禮曹判書進當幄次前俛

伏興啓請行禮啓訖俛伏興判通禮導殿下出幄詣版位西向立判

通禮啓請四拜哭殿下四拜哭盡哀執禮曰四拜哭在位者皆四拜

哭盡哀先拜者不拜判通禮導殿下詣盥洗位北向立內侍跪取盃與沃

水又內侍跪取盤承水殿下盥手悅手訖內侍受巾奠於籠判通禮

導殿下升自東階詣尊所西向立執尊者舉罌酌爵近侍內侍從升近侍

以瓚受酒判通禮導殿下詣靈座前北向立啓請跪近侍一人奉香

合一人奉香爐跪進判通禮啓請二上香近侍奠爐于案近侍以瓚跪

進判通禮啓請執瓚灌地訖以瓚授近侍近侍受以授大祝近侍以幣

筐跪進判通禮啓請執幣獻幣以幣授近侍奠于靈座前九進首進瓚

西向真爐受瓚奠幣皆在判通禮啓請俛伏興小退再拜導進幣皆在東 殿下降

自東階復位小判通禮導 殿下升自東階詣尊所西向立執尊者

舉纂酌酒近侍二人以爵受酒判通禮導 殿下詣靈座前北向立啓

請跪近侍以爵跪進判通禮啓請執爵獻爵以爵授近侍奠于 大王

靈座前近侍以副爵跪進判通禮啓請執爵獻爵以爵授近侍奠于

王后神位前判通禮啓請俛伏興小退北向跪大祝進靈座之右東向

跪讀祝文訖判通禮啓請俛伏興再拜導 殿下降復位謁者引亞獻

官詣盥洗位北向立盥手悅手訖謁者引亞獻官升自東階詣尊所西

向立執尊者舉纂酌酒執事者二人以爵受酒謁者引亞獻官詣靈座

前北向立贊跪執事者以爵授亞獻官亞獻官執爵獻爵以爵授執事

者奠于 大王靈座前執事者以副爵授亞獻官亞獻官執爵獻爵以

爵授執事者奠于 王后神位前謁者贊俛伏興小退再拜引降復位

謁者引終獻官行禮如亞獻儀引降復位判通禮啓請四拜哭 殿下

四拜哭盡哀執禮曰四拜哭在位者皆四拜哭盡哀禮曹判書跪啓禮畢啓訖俛伏興判通禮導 殿下還幄次謁者引亞獻官終獻官出通

禮門分引陪祭群官以次出贊引引典祀官以下諸執事俱復拜位立

定執禮曰四拜典祀官以下諸執事皆四拜贊引以次引出大祝納神

主如儀執禮帥謁者贊者贊引就拜位四拜而出典祀官帥其屬徹禮

饌祝幣瘞於坎群官移班近東班首進名奉慰亞獻官以下諸執事官

品與祥祭同○禮曹啓 元敬王太后祥祭禫祭儀其祥祭儀曰前期

尚衣院陳禫服黻布衣烏紗帽黑角帶黻韻會淺青黑色于齋殿通禮門設 殿下版位於

東階東南西向設亞獻官終獻官位於 殿下版位之後近南西向北

上執事者位於其後異位重行俱西向北上設執禮位於東階西南西

向謁者贊者贊引在南小退俱西向北上若內庭窄狹則設贊者位於於外庭東階西南西向宗

室以下文武群官位於外庭文東武西中心為頭異位重行俱北向設

監察位二於東西班後北向書吏各陪其後典祀官率其屬奠祝版於

靈座之右有陳幣籠於尊所設香爐香合并燭於靈座前次設祭器實

饌具設尊所於戶外之左在玄酒皆加勺在纍北向西上設洗於東階東南向北

盥洗在東纍在洗東加勺在籠在洗西南肆實以巾若爵洗之籠亞終獻洗又

於東南北向盥洗在東盥在洗東加勺篚在西南肆實以巾若爵洗之篚設諸執

事盥洗於亞終獻洗東南北向時至典祀官帥其屬入實饌具畢諸享官及

陪祭群官皆就殿門外判通禮導殿下詣齋殿即座執禮大祝詣者贊者

贊引入就殿庭拜位重行北向西上再拜各就位通禮門分引宗室以下文武群

官入就位謂者引亞獻官終獻官入就位大祝開匱奉出神主設於座覆以青

苧巾禮曹判書進當齋殿前俛伏興跪啟請入哭啟訖俛伏興判通禮導

殿下出齋殿詣版位西向立判通禮啟請再拜哭殿下再拜哭盡哀執禮

曰再拜哭元執禮有辭贊者皆傳唱在位者皆再拜哭盡哀判通禮導殿下還齋殿

謂者引亞獻官終獻官出通禮門分引宗室以下文武群官以次出禮曹

判書進當齋殿前俛伏跪啟請服禫服啟訖俛伏興殿下服禫服宗室

以下文武群官皆服禫服執禮帥謂者贊者贊引先就殿庭拜位重行北

向西上四拜各就位贊引引典祀官大祝齋郎入就殿庭拜位立定執禮

曰四拜典祀官以下皆四拜贊引引諸執事詣盥洗位盥悅訖各就位通禮

門分引宗室以下文武群官入就位謂者引亞獻官終獻官入就位執事

者詣爵洗位洗瓚拭瓚洗爵拭爵置於篚奉詣尊所置於坫上禮曹判

書進當齋殿前俛伏跪啟請行禮啟訖俛伏興判通禮導殿下出齋殿詣

版位西向立判通禮啓請四拜哭 殿下四拜哭盡哀執禮曰四拜哭

在位者皆四拜哭盡哀先拜者不拜判通禮導 殿下詣盥洗位北向立內

侍跪取匱興沃水又內侍跪取盤承水 殿下盥手內侍跪取巾於籠

以進 殿下悅手訖內侍受巾奠於籠判通禮導 殿下升自東階侍

內侍從升詣尊所西向立執尊者舉罍酌鬱鬯近侍以瓚受酒判通禮導

殿下詣靈座前北向立啓請跪近侍一人奉香爐一人奉香合跪進判

通禮啓請三上香近侍奠爐于案近侍以瓚跪進判通禮啓請執瓚灌

地訖以瓚授近侍近侍受以授大祝近侍以幣籠跪進判通禮啓請執

幣獻幣以幣授近侍奠于靈座前允進香進瓚皆在東西向奠爐受瓚奠幣皆在西東向進爵奠爵准此

判通禮啓請俛伏興小退再拜哭導 殿下降自東階復位小頃判通禮

導 殿下升自東階詣尊所西向立執尊者舉罍酌酒近侍以爵受酒判通

禮導 殿下詣靈座前北向立啓請跪近侍以爵跪進判通禮啓請執爵

獻爵以爵授近侍奠于靈座前判通禮啓請俛伏興小退北向跪大祝

進靈座之右東向跪讀祝文訖判通禮啓請俛伏興再拜導 殿下降

復位謁者引亞獻官詣盥洗位北向立盥手悅手訖謁者引亞獻官升

自東位詣尊所西向立執尊者舉罍酌酒執事者以爵受酒謁者引亞

獻官詣靈座前北向立贊跪執事者以爵授亞獻官亞獻官執爵獻爵以爵授執事者奠于靈座前謁者贊俛伏與小退再拜哭引降復位

謁者引終獻官行禮如亞獻儀引降復位判通禮啓請四拜哭殿下四

拜哭盡哀執禮曰四拜哭在位者皆四拜哭盡哀禮曹判書跪啓禮

畢俛伏與啓訖判通禮導殿下還齋殿謁者引亞獻官終獻官出通

禮門分引陪祭群官以次出贊引引典祀官以下諸執事俱復拜位立

定執禮曰四拜典祀官以下諸執事皆四拜贊引以次引出大祝納神

主如儀執禮帥謁者贊者贊引就拜位四拜而出典祀官帥其屬徹禮

饌祝幣瘞於坎群官移班近東班首進名奉慰○禫祭儀曰第十五月

之前期通禮門設殿下版位於東階東南西向設亞獻官終獻官位

於殿下版位之後近南西向北上執事者位於其後異位重行俱西向

北上設執禮位於東階西南西向謁者贊者贊引在南小退俱西向北

上若內庭窄狹則設贊者位於外庭東階西南西向設宗室以下文武羣官位於外庭文東武

西中心為頭異位重行俱北向設監察位二於東西班後北向書吏各陪

其後典祀官帥其屬奠祝版於靈座之右有陳幣篚於尊所設香爐香

合并燭於靈座前次設祭器實饌具設尊所於戶外之左玄酒皆加勺

纂北向西上設洗於東階東南北向盥洗在東疊在洗東加勺篚在洗

西南肆實以巾若爵洗之篚則又實以爵亞獻終獻洗亦於東南北向盥洗在東疊

在洗東加勺篚在洗西南肆實以巾若爵洗之篚則又實以巾設諸執事盥洗於亞

終獻洗東南北向時至典祀官帥其屬入實饌具畢諸享官及陪祭群

官皆就殿門外判通禮導殿下詣齋殿即座執禮帥謁者贊者贊引

先就殿庭拜位重行北向西上四拜各就位贊引引典祀官大祝齋郎

入就殿庭拜位立定執禮曰四拜贊者皆傳唱典祀官以下四拜贊引

引諸執事詣盥洗位盥悅訖各就位通禮門分引宗室以下文武群官

入就位謁者引亞獻官終獻官入就位大祝開匱奉出神主設於座覆

以青紵巾執事者詣爵洗位洗瓚拭瓚洗爵拭爵置於篚奉詣尊所置

於坫上禮曹判書進當齋殿前俛伏跪啓請行禮啓訖俛伏興判通禮

導殿下出齋殿詣版位西向立判通禮啓請四拜哭殿下四拜哭

盡哀執禮曰四拜哭在位者皆四拜哭盡哀先拜者判通禮導殿下

詣盥洗位北向立內侍跪取匜興沃水又內侍跪取盤承水殿下盥

手內侍跪取巾於篚以進殿下悅手訖內侍受巾奠於篚判通禮導

殿下升自東階近侍內侍從升詣尊所西向立執尊者舉纂酌鬱鬯近侍以瓚

受酒判通禮導 殿下詣靈座前北向立啓請跪近侍一人奉香爐一

人奉香合跪進判通禮啓請三上香近侍奠爐于案近侍以瓚跪進判

通禮啓請執瓚灌地訖以瓚授近侍近侍受以授大祝近侍以幣籠跪

進判通禮啓請執幣獻幣以幣授近侍奠于靈座前九進者進瓚進幣皆在東西向

奠爐受瓚奠幣皆在西判通禮啓請俛伏興再拜導 殿下降自東階

復位小頃判通禮導 殿下升自東階詣尊所西向立執尊者舉冪酌

酒近侍以爵受酒判通禮導 殿下詣靈座前北向立啓請跪近侍以

爵跪進判通禮啓請執爵獻爵以爵授近侍奠于靈座前判通禮啓請

俛伏興少退北向跪大祝進靈座之右東向跪讀祝文訖判通禮啓請

俛伏興再拜導 殿下降復位謁者引亞獻官詣盥洗位北向立盥手

悅手訖謁者引亞獻官升自東階詣尊所西向立執尊者舉冪酌酒執

事者以爵受酒謁者引亞獻官詣靈座前北向立贊跪執事者以爵授

獻官亞獻官執爵獻爵以爵授執事者奠于靈座前謁者贊俛伏興

小退再拜引降復位謁者引終獻官行禮如亞獻儀引降復位判通禮

啓請四拜哭 殿下四拜哭盡哀執禮曰四拜哭在位者皆四拜哭盡

哀禮曹判書跪啓禮畢啓訖俛伏興判通禮導殿下還齋殿謁者引亞

獻官終獻官出通禮門分引陪祭群官以次出贊引引典祀官以下諸執事俱復拜位立定執禮曰四拜典祀官以下諸執事皆四拜贊引以次引出大祝納神主如儀執禮帥謁者贊者贊引就拜位四拜而出典祀官帥其屬徹禮饌祝幣瘞於坎群官移班近東班首進名奉慰訖尚衣院進吉服○壬子通事崔雲回自京師啓表箋內畫日問於禮部員外郎黃鍾鍾曰正朝聖節千秋以賀日填之謝恩進賀以拜表日填之又啓到豐潤縣聞本國逃僧到縣尋至適車所八僧隱避唯見一僧問曰汝乃我國僧耶荅曰然又問何鄉里人耶荅曰僧本遊方安有鄉里遼東鎮撫曰上朝之人不可共語臣等應之曰四海一家與本國僧語何害○兵曹啓各道醫學教諭檢律各有其任今不事其任專媚監司監司亦常率行違於委任之意且驛路有弊自今令憲司考察違者并罪監司上王從之○癸丑同知摠制張思忠奉賻紙八十卷○甲寅大雨仁政殿鷲頭皆頽上軫慮停視事政府六曹臺諫合辭啓曰殿下以水灾軫慮畏天憂民之心至矣然憂慮而不視事臣等以爲不可伏望日勤聽政側身修德以弭天灾上曰善予非不欲聽政今日雨甚故權除耳禾穀旣盡傷損已無秋成之望今雖開霽民將何賴以

生卿等宜各悉心救民以副予意○乙卯視事○全羅道大風毀長興府城門飛鳥墜死大木拔諸浦兵船傷破者四十隻軍人溺死者五十餘名○祈晴于北郊群望○禮曹啓在前刑官不與祭然今元敬王太后之喪義同親母百官並以子道行喪除吉制外應于喪事之祭刑官亦之與祭從之○忠清道水軍都安撫處置使啓浚海之民習於舟楫與山郡之民不同初置諸浦水軍時或有山郡之民專屬一浦者若有賊變必不能行船請以浚海及山郡之民均分以屬諸浦從之○丙辰遣宦官李村于豐壤宮問起居○以水灾減省各殿差備宣飯○丁巳視事○教曰今者雨水爲灾將值凶歉凡爾臣庶各自節用毋得妄費○禮曹啓大妃大祥後上下並用淡青色灰色其未及備者通著黑麻布淡土紅衣從之○戊午親傳社稷宗廟祈晴祭香祝○己未上朝豐壤宮○兩上御水亭視事設小酌○祈晴于社稷宗廟○庚申兩上御水亭視事仍設小酌柳廷顯朴訔李原卞季良趙末生尹淮金益精權蹈郭存中曹崇德等侍議請還逃僧適休事○秋七月辛酉朔上還自豐壤○上始復御素膳以元敬王太后再期近也○壬戌司憲府啓朴子青監督仁政殿營繕之役令驚頭頽落尹子當入朝

京師暗藏禁物請依律科罪 上皆原之○曹崇德賫奏本如京師奏  
曰議政府狀啓慶尚道都觀察使徐選備知陝川郡事裴契呈郡吏李  
中貞避役爲僧稱名適休冒受僧職事覺在逃推問本僧親兄僧人具  
供稱弟適休逃往平安道香山內院寺寄住呈乞施行得此行據平安  
道都觀察使金漸呈據本道延山都護府使權文毅呈見奉劄付具問  
得本府香山內院寺住僧信惠供稱本寺來住僧適休於永樂十九年  
正月十六日誘引僧信休信淡惠禪洪迪海丕信然洪惠信雲等八名  
潛從山谷逃往遼東去了得此具呈又本年六月初六日陪臣工曹判  
書尹子當回自京師言說當職回到山海衛路上撞見本國僧適休等九  
名說稱前往北京得此具啟據此參照小邦僧俗人民並皆付籍據僧  
適休既避本役誘引同伴敢行逃走理宜奏達○卒光祿小卿鄭允厚  
之子仁貴從崇德如京師朝見以追謝 皇帝賜祭之恩也○盡入書  
雲觀所藏天文秘記于內○司諫院上疏曰臣等竊謂三代以前未有  
佛也至于漢明帝時其法始行侵盛於梁陳其為教也本以清淨寂滅  
爲宗而外天下國家者也固悖於聖人格致誠正修齊治平之教矣其  
爲徒者以虛誕誣妄禍福報應之說稱爲勸善橫行閭里誘愚民而取

其財甚者專以檀施之物歸於自利之資於其師清淨寂滅之教又何如哉所謂一人耕之十人食之一人蚕之十人衣之也乃之何民不飢且寒也昔韓愈作原道推明堯舜三王之道深斥佛氏之非曰不塞不流不止不行其人其人火其書廬其居明先王之道以道之鰥寡孤獨廢疾者有養也以爲佛氏之徒不塞不止則聖人之道不流不行而鰥寡孤獨不得其養也恭惟 殿下以天縱之聖緝熙之學窮性理之源辨異端之僞誠千歲一盛際也斥邪說之誣民使不得行軀遊手之緇徒轉而緣南畝永革不絕之餘習挽回三代之治道正在今日臣等深有望焉且以其最切而近者言之今之僧徒祖其師說以廢天理滅倫理辭親割義出入無方爲事故至有私結朋黨潛往他境如適休者矣但適休等幸道遇本國使臣之行以露其形迹耳安知如適休者前後亦有之而不知哉此非細故其漸不可長也長此不已則臣等竊恐僧徒托爲遊方往返彼此者繼踵而起矣又有犯罪惡爲逋逃者髡其髮變其服潛形以往妄生事變則爲之奈何臣等深以爲慮焉若以佛氏之教行於世也已久習俗旣熟其法不可遽斥其徒不可一朝盡去則姑且預爲之方勿至濫溢嚴爲之禁勿使橫行可也願自今僧人出家之

法依經濟六典申明糾理其度牒之式亦依初入仕例僧錄司報于禮曹禮曹移關臺諫署經施行且其名數亦不可不知願令中外官吏推其境內僧徒考其度牒錄成案籍毋令彼此移徙依鄰保之法定其色掌僧人使有統率其出入之時京中則禮曹外方則所在官受其告狀計其道路遠近書其往來日期以給行狀其有無度牒者身不付籍者出入無行狀者往返過期者彼此移徙者無時考察痛繩以法 上不允○癸亥 親傳 宗廟原廟諸山陵秋享祭香祝○遣醫盧仲禮于讓寧大君弟問疾○判漢城府事鄭津等上疏曰竊惟陰診之災氣數之使然雖聖人有所不能免焉然其救災備患之事則人力之所可爲也歲在辛卯 上玉殿下慮川渠之未鑿溝洫之未浚爰命有司大開川路䟽鑿決排各盡其宜因造石橋邦家有盤石之固民庶得安枕之樂爲萬世備患之慮至矣盡矣然而支流細川有未盡開鑿者有司獻議以畢九仞之功 上玉殿下重用民力以爲萬世之基不必遽成於一時役不踰時仍罷其役其憂國愛民之意至深切矣恭惟 主上殿下續承丕緒繼志述事愛一夫之力惜十家之產凡有興作深閉固拒未肯俯從敬天勤民之念靡所不至矣今者雨水逾月不止前月十二日之

夜大雨水溢下流淤塞都城之內復有墊溺之患與言及此以 殿下  
父母之心好生之德軫心惕慮難以云喻臣等竊伏惟念勞民興役雖  
聖人之得已救災備患實王政之所先伏望 殿下特命有司每當農  
隙悅以使民不竭其力臣等職掌都邑不敢舍默謹以一二管見條列  
于後一兩處水門左右窺城狹隘都城內衆水合流淤塞故東部彰善  
坊被災尤甚願令有司相地之宜別作一水門以通水道則汎濫決溢  
之勢庶可減矣一鍾樓以下地皆卑下都城之水輻輳建瓴家舍漂溺  
埋勢必至願令有司因其舊渠鑿開川路既深且廣以備水災又於左  
右行廊之後開一大渠庶爲便益一鎮長坊山谷衆水奔流激破故景  
福宮東面內城若干尺頽圯若復數年幾斷城內其勢莫遏願令有司  
開川疊石以防水道景福宮西城之外亦宜開川決流其餘開渠穿鑿  
之處難以遍舉願令有司臨時量宜施行一貞善坊橋一蓮花坊橋二  
彰善坊橋三德成坊一右七橋車駕之所常行不可不堅緻牢固也  
先是皆作木橋一經雨水則盡爲漂流材木之費勞民之役無歲無之  
且當暑雨之時必至朽敗其不堅牢明矣請命有司俾作石橋庶免此  
患 上命工曹待農隙施行○甲子 上行秋享于廣孝殿○以韓長

壽判中軍都摠制府事許稠叅贊議政府事李之剛爲禮曹判書曹備  
衡判漢城府事金漸知敦寧府事申浩戶曹判書崔閔德工曹判書黃  
子厚左軍摠制郭存中同副代言申檣集賢殿副提學閔義生判司宰  
監事知兵曹事朴安信司憲執義曹尚司諫院右獻納李師益右正言  
鄭津平安道都觀察使○重修南部學堂以中部學堂生徒分置教養  
○先是日本諸道使者到海邊不待關報上京或有到漢江而後知之  
者命政府禮曹議之禮曹判書許稠議曰在前倭船到海邊則觀察使  
報本曹待回報上京緣此久留海邊或至一二朔多費官糧故令報曹  
後不待回報上京而馳報者中路淹滯倭使或先到漢江臣欲具啓更  
張而適因東征倭使不通今旣通好請令觀察使馳報本曹待回報上  
送 上命馳報後五六日發遣○乙丑視事○日本國竺州府石城縣使  
民部小輔平滿景遣人獻硫黃二千斤銅一百斤土黃十斤香木三斤  
扇二十柄仍帛 元敬王太后之喪宗金亦遣人獻土宜○遣內臣賜  
守陵官驪川君閔汝翼酒○命司憲府曰比者水災太甚不待有司之  
請下禁酒之令愚民之犯令者皆以制書有違重論實爲未便今後犯  
令者以違令論○吏曹啓今後諸司提調兼判事坐不坐本曹專掌考

察每當月季開寫坐司日數以啓以為恒式 從之○平安道兵馬都  
節制使啓本道軍丁之數馬兵戶首一萬一千八百十五步兵戶首一  
萬一千三百十二同居三萬一千四百七戶別八千三百八十八同居  
一千四百七十七水軍尸首四千八十同居四千五百四十戶別三千  
七百二十一同居八百四十五總計水陸軍丁七萬七千四百八十七  
○丙寅視事○遣行臺監察崔士庸崔孝孫于京畿左右道○宣旨大  
小人負事干軍務出使復命外毋得詣離宮肅拜諸曹如有不得已啓  
我事啓 主上殿令代言司送于兵曹毋得直來蓋厭其煩也○議政  
府啓六曹臺諫漢城府允受教事皆報本府而吏兵曹允口傳皆不報  
府憑考無門今後並令呈報永為恒式○丁卯 上與中宮還御昌德  
宮○命構招頂公種福宇於其第北種娶成抑女無子 上以第三子  
瑑為後○戊辰有野鴨來巢仁政殿鷲頭養雛○親傳 元敬王太后  
大祥齋香祝○禮曹啓 元敬王太后大祥後儀仗用青陽繖烏杖  
從之○己巳 親傳敵陵大祥祭香初○兵曹啓陣圖之法軍國急務  
不可不預習也外方軍士專不習陣實為未便今後令各道節制使每  
當農隙別牌及侍衛營鎮屬守城軍等各以附工聚會以守令之明習



中衛自為一陣凡陣各面住隊連排即今防牌次槍長劍次火燭弓弩次騎  
 槍次騎射陣內布列內外皆然五衛有五色章中衛黃章圓五寸置於  
 衿前前衛赤章三方七寸置於腹左衛青章長八寸廣三寸置於左肩  
 右衛白章方四寸置於右肩後衛黑章曲面六寸置於背各書位號及  
 各所各隊之號并畫認獸五衛各有五所凡一卒隔六尺馬倍之結隊  
 五人自相得意者結為伍伍中有長二五為小隊中有長五五為中隊  
 隊有正五十有大隊隊有校五十人須結其心行立前却當隊并須依  
 附戰則五五而立將校在後督戰結陣之法本無常形多至六十有四  
 蓋皆隨時因勢而變也然其大要不過五行而已一應敵中衛鼓一通  
 諸衛遊軍伺候進受中軍之令諸衛遊軍先出四方望候彼敵角報其  
 衛其衛角報中衛中衛吹角而黑旗指前鼓動則後衛先出當敵赤旗  
 指前鼓動則前衛先出當敵他衛倣此一衛先出他衛出兵以救皆以  
 中衛旗鼓角之節而應之若四面受敵則各望聽其衛旗鼓角之節而  
 戰中衛分兵往救凡出兵應敵之軍齊進十步而散立馬亦不過五十  
 步而止戰敵敗奔走則鼓角合動馬兵進而追擊遊軍步卒布列四面  
 救援馬兵然後就次追擊之時不失行伍聞金則止一鐘緩圖二鐘止聞  
三鐘回背四鐘退

五鼓急退鼓急則復進急擊若彼強我弱欲為後圖各衛不失行伍結陣而

退左前衛遊軍馬步為一隊殿而還之聞金而止見旗結陣而守若中

衛受敵轉陣受敵及谷戰林戰水灌火攻等法又在主將料敵設機臨

變制勝不可殫記一教場四表進退中衛角一通五衛旗人各以其方

立旗于陣場中衛鼓動五衛整兵各就其旗下陣訖九結陣及徐行步

後中衛鼓動五旗指前五衛出就第一表齊頭重行鼓行至第二表擊

金弊旗乃止皆坐九坐騎下馬中衛鼓動作旗五衛皆作鼓進騎馳步

趨及第三表擊金弊旗乃止皆坐鼓又動作旗五衛皆作鼓進騎步皆

疾走及第四表擊金弊旗乃止皆坐作旗角一通鼓一通騎一旋馳步

一旋闐九三而止金一聲緩闐二聲止闐三聲回背行退及第三表乃

止坐作如初但向第四表回坐金四聲趨退却行及第一表乃止坐作

如初金五聲急退却行及第一表乃止坐作如初角一通金五聲五衛

急就陣各復其局兵進以鼓九出軍中衛循陣搖鐸令曰九在陣者望

聽旗角金鼓之節坐作進退毋失其次毋譁毋亂以干兵法五衛皆坐

聽令其有應進而不進應退而不退不應進而進不應退而退擅左右者

亡章服者告主將便斬五中失二人罰不救三人小隊失四人罰不

救六人二十五人隊失八人者罰專隊不救亡五而得五亡長而得長  
亡將而得將者各當之亡五不得五亡長不得長亡將不得將者罰得  
五而不失五得長而不失長得將而不失將者賞○庚午 上率百官  
行大祥祭于廣孝殿○遣醫揚弘達于左議政朴嘗第問疾○完川君  
李淑妻奉氏死遣宦官吊之○辛未 上朝豐壤宮○兩上同御水亭  
視事設小酌○全羅道水軍處置使朴礎啓兵船二十二隻遭風敗沒  
溺死者十人漂風不知去向者九十一人 上王聞之流涕以僉知揆  
制趙蓄爲全羅道體覆使鞠礎及諸浦萬戶以聞○戶曹請以留後司  
陳穀二千石賣于民間以救民生從之○壬申 上在豐壤宮○癸酉  
上還自豐壤○吏曹啓以領議政爲 宗廟署實案都提調從二品以  
上一人爲提調左議政爲 文昭殿實案都提調右議政爲 廣孝殿  
實案都提調從之○對馬島左衛門大郎致書于慶尚右道水軍都安  
撫使贈鞭藤五十命政府禮曹議之領議政柳廷顯等以爲不受則彼  
必怨怒宜受之以豹皮綵布答之禮曹判書李之剛以爲人臣義無私  
交不宜受之乃令都安撫使都鎮撫答書曰來書已達我使相且知厚  
意甚以爲喜然自古人臣義無私交所惠物件似難容受祇緣足下恭

事本朝其誠彌篤茲用啓達收納仍將土宜虎皮二領席十張就付回  
价惟照領○甲戌親傳 宗廟原廟諸山陵香祝○乙亥 上詣廣孝  
殿行望祭始用吉服○視事○命停諸道禫後賀箋方物○丙子 上  
王御水亭視事○上視事○前開城留後司留後安省卒輟朝三日賻  
紙七十卷謚思簡追悔前過曰思平易不訾曰簡○順德侯陳理妻李  
氏上言今以女督李天卿爲井邑縣監無他子督奉養者年老病深語  
音不通乞移任京畿以垂聖恩從之○丁丑罷繕工提調朴子青判事  
尹麟注簿鄭萊直長呂賈職先是 恭靖王病篤後宮令飯監金浩具  
酒饌禱于木覓之神浩私用之事覺逃匿 上王令遍搜國中不獲以  
其妻子族屬屬繕工監皆以正身定爲苦役子青聽妾謁以浩之族三人  
爲根隨尹麟以一人爲根隨萊許一人代身賈以一人定爲歇役至是  
憲府請子青等罪上啓于 上王罷子青等職時子青麟等方監督  
廟室役乃命畢功麟以繕工權知直長阿附子青未十年官至顯秩允  
功役專聽子青指揮餘官不得用事但同坐唯唯而已○左軍都摠制金  
萬壽卒輟朝三日賻紙七十卷萬壽延安府人性厚直以武略擢拔他  
無可稱前此大臣卒 上王亦遣宦官吊祭賜燭至是令趙末生論

上曰致賻國有常法予不行之謚莊襄勝敵志剛曰莊甲冑有勞曰襄  
○兵曹啓每年春秋兵器點閱時無標甲冑及假借者皆沒入庫內年  
久爲鼠虫所破終於無用請移文鎮撫所分赦前後論罪還給求爲  
式上王從之○戊寅禮曹啓歷代追崇之祖奉祀之制本曹與儀禮  
詳定所謹稽古制集侍從臺諫文武二品以上議僉謂穆祖當遷依宋  
朝追崇僖順翼宣四祖別廟奉祀例令有司別建祧廟奉祀從之時  
摠制金月下女真人也性本純直不解一字亦以一品與會議之列郎官  
問宗廟誰可爲不遷之尊曰太祖問追崇四祖祀否曰不可不祀時  
人服其無知而議與古人合於是朝廷又議建廟之地左議政朴訔以  
爲四祖殿若在大室之西則宗廟太祖以下皆子孫也夫卑者在側  
而四時大享尊者不與於人情未安長生殿在國之西與宗廟隔請  
以爲四祖殿參贊卞季良亦請於宗廟隔遠地建廟時上王在豐  
壤宮禮官具啓上王曰祖宗在天之靈豈容地之遠近有聞不聞  
耶且爲祖宗難於土木役而用古殿非禮也宜遵古制建廟大室之西  
號則宜曰永寧殿蓋祖宗子孫有俱安之意云○命禮曹判書李之  
剛參判河演參議許咳兵曹參判李明德知申事金益精等與相地人

李陽達高仲安尹敦智卜永寧殿基於宗廟垣內大室之西○己卯禮曹啓春秋燹祭不分大中小祀未便依諸祀儀式小祀例散齋二日致齋一日籩豆各八其餘奠物儀注仍舊從之○全州府尹鄭耕卒于官耕羅州人高麗名將地之子雄偉智略不及其父而性敦厚明爽嘗牧義州安東有聲績以老母在光州爲全羅道觀察使又再爲都節制使軍民畏而愛之至是病卒年五十二子二種穢○庚辰視事謂知申事金益精曰在前大臣卒必待特旨賜祭予以謂大臣之卒皆當賜祭其令禮曹稽古制以聞○賜倭人藤次郎三未三甫羅等家舍口糧及奴婢各二口次郎善造舟楫者○辛巳日暈○視事○全羅道監司張允和啓左道都萬戶金孟鈞突山萬戶葉漢龍進禮萬戶姜以忠築頭萬戶魯興道鹿島萬戶金湖等所管兵船傷破士卒溺死之罪臣已鞫問請并治都安撫使朴礎罪以戒後來上王命下體覆使趙菑依所啓鞫之○咸吉道監司申商移牒兵曹曰鏡城人童沙里甫下誘崔仲海長命金指等二十餘人逃往野人地面故囚沙里甫下諭其子童所羅與通事至東良北令挨刷逃人所羅刷其半以來然沙里甫下與吾良哈爲姻婭交相往來其情狀明矣又同里人李大豆等亦皆

知情宜並移之南道以絕其弊兵曹以啓 宣旨其子盡心刷還則不  
是專在沙里甫下也宜速移文勿令浮動以米布給所羅以賞刷還之  
功○司憲府上疏曰金浩所犯關係非輕人之所共憤也 上王殿下  
將其族屬定繕工苦役者欲令浩現身也朴子青知其實而徇私無忌  
罪固大焉尹麟鄭萊呂賚阿順子青所爲 殿下只令罷職罪重罰輕  
無以戒後判官林得貴知非不改錄事宋義剛許從代身之請亦不可  
容赦也伏望將子青等依律科罪以懲不恪 不允○壬午司諫院上  
疏曰朴子青別無才能濫蒙至恩位至宰樞尹麟出身吏胥官至三品  
宜當各盡乃心圖報萬一不此之願不從 宣旨金浩族親安然率行  
其爲罪惡與浩何異呂賚林得貴鄭萊阿順子青之罪亦不可不懲今  
憲司上疏論請只罷子青尹麟鄭萊呂賚職林得貴置之勿論臣等缺  
望伏望一從憲司所奏 不允○癸未百官以朝服逸賀千秋樂懸而  
不奏○上王語兵曹曰敬寧君於 主上殿進見無時漢原君受訓於  
集賢殿皆非也寵愛異於諸弟古所戒也吾將見 主上而陳之○甲  
申朝豐壤宮○全羅道兵馬都節制使啓內廂本營及四鎮兵馬在前  
分爲上下番及朴礎爲都節使始分爲四番本營及四鎮皆賊路要衝

萬一突入豈及徵聚近因風變船隻傷破水路防禦甚為踈虞不可不慮請依舊分上下番從之○乙酉兩上御水亭視事設小酌趙涓延嗣宗等侍○京畿觀察使啓喬桐國之門戶防禦不可不嚴而江華水軍六十一名東江水軍六名逃亡尚未充定三木紫燕二島水軍歲乙未移屬牧子由是水軍之習於舟楫者蓋寡請以二島水軍還屬喬桐其牧子以寺社奴婢充之上王從之○丙戌上還自豐壤○丁亥全羅道光陽縣龍門浦水赤九十五日○視事命禮曹祧室廣狹一依宗廟之制祭贊許稠啓曰宗廟五室甚隘狹每當行祭進退甚難且禘祭則在南神主不得居廟內坐戶外必矣須當廣其楹內今創祧室何必効此上曰卿言是也即遣李明德啓于上王上王曰宗廟雖隘狹自太祖傳至四君事無欠闕何必改作祧室之制亦當依此營之○戶曹判書申浩啓曰倉庫米豆贏餘無有藏處請莊於崇禮門內行廊上曰若奪行廊藏穀居民將安之浩莫能對○築昆南城○趙藩鞠朴礎金孟鈞等以聞且曰礎以捕倭爲名率兵船入島漁獵以致船敗軍溺喪失兵器殊無委任之意請置於法宣旨萬戶金孟鈞等宜贖死罪然破船之日風變大甚禽鳥墜落樓閣崩毀非人力所及減等贖

杖百礎待畢劾更議○刑曹啓永樂十七年七月二十日 宣旨補充  
軍定屬以後專不立役者及逃避者贖身及婢妾產身良水軍勿問是  
非補充軍各還給本主陳告者稱干稱尺補充軍各還定本役爲官奴  
婢然還賤條欵尚未定奪故今商確條列以啓一其婢妾產身良勿問  
是非補充軍等專不立役者及逃避者姊妹女子依稱干稱尺人例並  
給本主若一家同產四五人內一人立役一人逃避則其姊妹女子並  
屬賤口實爲未便請分揀施行一雖祖先奴婢補充軍定屬前若他人  
役使而限前不呈狀相訟者今雖呈狀並不聽理從重治罪其中在前  
役使本主無子息物故者許使孫陳告一避役補充軍還屬諸司者當  
該官吏遞差後或不檢考中間閑遊者有之今後依公處漏落奴婢陳  
告例許人陳告賞給 上命姊妹女子勿令屬賤本主無子息物故者  
限使孫四寸許令陳告無使孫而他人陳告者依公處奴婢賞給例賞  
之○戊子視事金漸前爲平安道監司啓請勿遣損實敬差官至是承  
政院啓其狀漸因啓曰一道之事專委監司獨於踏驗別遣敬差爲敬  
差者僅知卜結之數而監考書負任意加減民受其弊請委之監司守  
令令親執磨勘以絕其弊不允○上王將欲大閱分遣習陣訓導

官于諸道○賜昌寧府院君成石璘西原府院君韓尚敬酒○平安道  
蝗○兵曹啓諸道陣法訓導事目一習陣時犯法守令及三品以上軍  
官報觀察使觀察使覈實論罪一二十三陣一時教閱爲難以方圓曲  
直銳五陣及行陣教習一平安道閭延朔州義州江界咸吉道慶源鏡  
城甲山軍馬若聚會教閱則防禦疎虞其軍官解文字者招致教習一  
留後司作牌軍人內簽發馬兵教閱令本司郎廳一人掌之 從之○  
己丑視事○江原道監司啓春川盲人金繼玄告郡人朴成幹朴仁幹  
等嘗言欲率侍衛別牌附于芳幹 命下義禁府鞠之○庚寅 親傳  
宗廟原廟諸山陵香就

世宗莊憲大王實錄卷第十二

世宗皇帝大王受命卷第十二

庚申夏五月庚辰朔

庚申夏五月庚辰朔 命丁魏禁放諱之○庚寅 賚

○庚寅 賚 命丁魏禁放諱之○庚寅 賚

命丁魏禁放諱之○庚寅 賚 命丁魏禁放諱之○庚寅 賚

命丁魏禁放諱之○庚寅 賚 命丁魏禁放諱之○庚寅 賚

命丁魏禁放諱之○庚寅 賚 命丁魏禁放諱之○庚寅 賚

命丁魏禁放諱之○庚寅 賚 命丁魏禁放諱之○庚寅 賚

命丁魏禁放諱之○庚寅 賚 命丁魏禁放諱之○庚寅 賚

命丁魏禁放諱之○庚寅 賚 命丁魏禁放諱之○庚寅 賚

(B)  
732.55  
4724  
[v.4]  
no.4  
0163662

昭和五年九月十五日印刷  
昭和五年九月二十日發行

(景李朝實錄太白山本)

京城帝國大學法文學部

京城府蓬萊町三丁目六十二番地

印刷所 朝鮮印刷株式會社

(B)  
732.55  
4724  
[v.4]  
no.4